

張說之文集



墨 鈔 止

劬 齊 集

四 諤 廿

又

卷

補

與

又

卷

光緒乙巳仁和朱氏刊

明絲紙鈔本二十卷

唐初人久集流傳固少以舊鈔本致難得
芸楷 庚子 中秋

近取珍版有重輯本惜不收批答同作諸篇然於集
外補入本傳唐文粹文苑英華所載文六十一首亦可喜
二本不可偏廢 芸楷再讀

已酉
小雲



明竹紙鈔本二十五卷

唐燕國公集二十五卷蓋吳元年手自抄錄以備一覽者也
初以勝國兵燹之變遺書散逸僅存其集於敝篋中猶多魚
魯復輟耕力以正之遂爲完物亟欲刊之而力不果吾後世
子孫有能新之以續有唐之文獻者乎唐去今千餘年其相
業隨世消長而文獨存然則世之所恃以爲不朽計者文焉
爾雖與天壤俱敝可也燕公之文豈曰雕龍如劉勰者爲哉
曲江公志文盡之矣更書一篇以冠其首時永樂九年秋九
月貞隱老人濠上德記



張說之文集卷第一

詩賦

御製喜雨賦

喜雨賦應制

進白鳥賦

并墨詔批答

虛室賦

晏居賦

江上愁心賦

畏途賦

侍宴武三思山第

侍宴蘘荷亭

侍宴臨渭亭

侍宴滄水

桃花園馬上

侍宴隆慶池

奉和春日幸望春宮

奉和登驪山矚眺

幸白鹿觀應制

扈從幸韋嗣立山莊

二首

奉和送金城公主

奉和同皇太子過慈恩寺二御製春日出苑遊矚

奉和春日出苑

并墨令
答讚

喜雨賦

御製

仰重華之齊政步文命而彝倫何天道之云遠亦明徵
而在人迄中夏而自春邁愆陽而爲亢雲重結而復解
雨纔滴而還障山祠植珪而不咎田峻倚耒而怙音悵
京兆來奏音官撰曲將土龍而矯首請神巫而頓足彼
有憑而可舉予何抑而未許恐歲凶之及人甯天譴於
我身爾乃潔齋壇墀五精是祠暴立炎赫三日爲期上
帝臨我衷誠不欺重泉蒸潤觸石吐滋平雲黯而鋪幕
密雨森其散絲無雷無電不震不眩匪疾匪徐乍合乍

疏汎草泊樹垂珠點露過闕入樓含煙雜霧或噴薄而攢集或淋漓而灌注亂積水之圓文拂微風之斜度寰海浹而康樂畎畝欣而相顧絲管合兮夜將曉芙蓉開今日未暮原夫雨之爲德也無大小之異情無高卑之不平無華朽之偏潤無薰臭之隔榮喜夫雨之今應也赴一言而不捨經累晨而廣瀉納清陰之浮涼混和氣而飄灑感作霖於殷命諷其雩於周雅家尙知乎禮節國有望於豐霸小陽臺之神人卻大宛之走馬體雲行而雨施吾何事乎天下

喜雨賦應制

史臣啟先王之冊府拔絕瑞於祥經樂雲雨之平施齊

品物之流形帝皇益重而為寶麟鳳自輕而讓靈况愆
時而渴望欲意達而神聽是月也朱明漸半紫油未吐
恐降災兮此下民罄虔祈兮我仁主退象龍之禮禱斥
持鷺之貌舞屏翳慚其廢職祝融悔其遷怒山決澇而
出雲天霧霏而下雨速一言而感應剋三日而周溥氣
翳靄以黤鳥黹音淡聲颯灑以蕭條璀如銀漢之屑落璨
似珠泉之噴澆街廓漫其潢潦皋壤萋其綠苗舒四溟
之清潤卷六合之煩囂咸澡骨於神液共歡心於聖朝
借如五月有梅雨之名三春有穀雨之氣越人以泥牛
待沃胡士賣土龍求費出員嶠而石香入成都而酒味
彼偏方與小節非大人之所貴復有送山祇於鬱島迎

海若於葛川疾雷辟其山裂走電（暍）其海然天子作愁
霖之賦詞人綴苦雨之篇牆屋壞於倒井黍稷流於下
田乃凶浸之不令曷休徵之有焉請言瑞雨之可喜也
協氣交泰嘉生是賴湛覃而不溺衍溢而不害東漸出
日之表西被無雷之外南窮火鼠之譯北盡燭龍之會
天文則雲漢昭回王澤則江河滂沛雖欲譚天而窺管
孰知堯德之爲大

進白鳥賦

并墨詔批答

咨大鈞之播氣在品物而流形有莫黑之凡族亦變白
而效靈感上仁於孝道合中瑞於祥經若夫事出神妙
理包舒卷賦集王屋飛隨帝輦捧日高翥迎風細轉識

句句於招呼每啞啞於啄吮以其雪羽霜毛冰精玉狀
拔奇綠林之下賞異紫臺之上瞰鳩鵲之紗窗抱鳳凰
之衣桁恐同類之見嫉畏不才之速謗願悉命於渥恩
豈顧私於閒放維聖君之靈囿物何遠而不臻有能言
而可重或善舞而取珍羞陋軀而入獻與寶羽而爲鄰
探朝噪之聲樂眷夜啼之曲新無芒距以耀武不鉤觜
以懷仁謝先容而特達卻假飾以全真鑒深心於反哺
移報德於君親

墨詔批答

得所進白鳥符彩明媚助日揚輝白羽翩翩凌霜比色
况乎反哺斯重能仁是高對之有歡情不能已又覽所

進放言體物詞藻瀏亮尋繹研味把翫無馱所謂文苑菁華詞場警策也今賞卿金五挺銀十挺云云

虛室賦

明月窗前古樹簷邊無北堂之樽酒絕南鄰之管絃理涉虛趣心階靜緣室惟生白人則思玄馱百慮之勞止歸一途之兀然嗟乎巧智首亂禮樂增矯名起異端利成貪兆役二見之交戰驅五神而雜擾形何費而不衰性何煩而不夭每竭源而追末必忘多而獲少玉帳瓊宮圖奢務豐朱門金穴恃滿矜隆榮與辱而俱盛事隨憂而不窮陷營爲之桎梏留健羨之池籠心元是幻法本皆空莫不因無證實假異生同魚何知而樂水蛇何

意而憐風大哉默識守此（玄）通顧瞻天下還如夢中

晏居賦

并序

吏部侍郎魏仁歸

張校書作虛室賦以示予文旨清峻（玄）義深遠予味之有感聊爲晏居賦以和之其詞曰

氣序忽諸日月其除夏盡炎歊秋至涼初地僻而人物自少庭閒而室宇成虛寂爾無晤蕭然晏居覽聖賢於上古窺得失於前書或智而不足或愚而有餘諒千變而萬化嗟難得而備疏若夫名因行立宦由才致官要則謗議斯起譽高必讒毀俱至所以君子逃名達人避位養性以安其體摛文以見其志且貴不如賤善亦同惡貴則但益憂勞善乃未離貪著徒憐顛覆之禍虛纏

愛慾之縛前事既忘後車安託儻來未足有慰或去可
以無怍固當絕於可否亦無勞於酬酢一本作齊其適莫四字無此句聞寵
詎警其心居陋甯改其樂蓋老氏稱德所貴先慈孔門
之道一以貫之於常則允出茲在茲屈伸委運行用隨
時既無去無取亦何慮何思

江上愁心賦寄趙子

岳州作

江上之峻山兮鬱崎

音岐敬嶷

音議

而不極雲爲峯兮煙爲色

歛變態兮心不識江上之深林兮杳冥蒙而巳鳥爲
花兮猿爲子紛盪瀆兮言莫擬夏雲陰兮若山秋水平
兮若天冬沙飛兮淅淅春草靡兮芊芊感四節之默運
知萬化之潛遷伴眾鳥兮寒渚望孤帆兮日邊雖欲貫

愁腸於巧筆紡離夢於哀絃是心也非模放之所逮將
有言兮是然將無言兮是然

畏途賦

青泥路白馬關雲足躡霞手攀忠臣往兮孝子還陟羊
腸臨鳥道搏絕岸援蔓草懸梁婀娜以樹接虛閣穹崇
而煙抱風雨滂汨兮崩泉而險湍圖畫詭屈兮紅峯而
碧巒林黝黝兮人靜山參參而地寒客有夢兮在城闕
背芳萱兮心不歇憫秋草之墜露弔窮崖之飛月聞哀
猿之一鳴憂人宿昔兮生白髮

長安應制侍宴武三思山第賦得風字韻

梁王池館好曉日鳳樓通竹町
音挺羅干衛蘭筵降兩宮

清歌芳樹下妙舞落花中
臣覺筵中聽還如大國風

侍宴蘘荷亭應制

迴鑾青岳觀帳殿紫煙峯
仙路迎三島雲衢駐六龍
園林看化塔壇墀識餘封
山外聞簫管還如天上逢

侍宴臨渭亭應制

青郊上巳豔陽年紫禁皇遊祓渭川
幸得歡娛承湛露
心同草樹樂春天

侍宴滻水應制賦得濃字

千行發御柳一葉下仙筇
青浦宣遊至朱城佳氣濃
雲霞交暮色草樹喜春容
藹藹天旗轉清笳入九重

桃花園馬上應制

林閒豔色驕天馬苑裏穠穠伴麗人願逐南風飛帝席
年年含笑舞青春

景龍應制侍宴隆慶池

景龍應制原注睿宗朱筆抹去按景龍中宗復

辟弟二改元作睿宗誤景龍應制四字與前長安應制後先天應制同均不提行

靈池月滿直城隈黼帳天臨御路開東沼初陽疑吐出
南山曉翠若浮來魚龍百戲分容與鳧鷖雙舟較沂洄
願似金隄青草馥長承瑤水白雲盃

奉和春日幸望春宮

別館芳菲上苑東飛花澹蕩御筵紅城臨渭水天河靜
闕對南山雨露通繞殿流鶯凡幾樹當蹊亂蝶許多叢
春園既醉心和樂共識皇恩造化同

奉和登驪山矚眺

寒山上半空臨眺盡園中是日巡遊處晴光遠近同川
明分渭水樹暗辨新豐巖壑清音暮天歌起大風

幸白鹿觀應制

洞府寒山曲天遊日旰迴披雲看石鏡拂雪上金臺竹
徑龍驂下松庭鶴轡來雙童還獻藥五色耀仙才

扈從幸韋嗣立山莊應制二首

寒灰飛玉琯湯井駐金輿旣得方明相還尋大隗居懸
泉珠貫下列帳錦屏舒騎遠林逾密笳繁谷自虛門旗
塹複磴殿幕裏通渠舞鳳隨公主雕龍賦婕妤好地幽天
賞洽酒樂御筵初菲才叨侍從連藻愧應徐

西京上相出扶陽東郊別業好池塘自非仁智符天賞
安能日月共迴光

奉和送金城公主應制

青海和親日潢星出降時戎王子聳寵漢國舅家慈春
野開離讌雲天起別詞空彈馬上曲詎減鳳樓悲

先天應制奉和同皇太子過慈恩寺二首

翼翼宸恩永煌煌福地開離光昇寶殿震氣繞香臺上
界幡花合中天日月來願君無量壽仙藻屢徘徊

二

朗朗神居峻軒軒瑞像威聖君成願果太子拂天衣至

樂三靈會深仁四皓歸還聞渦水曲更繞白雲飛

先天應令春日出苑遊矚

御製

太子時作

三陽麗景早芳辰四序嘉園物候新梅花百般障去路
垂柳千條暗迴津鳥驚直爲飛風葉魚躍都由怯岸人
唯願聖主南山壽何愁不賞萬年春

奉和春日出苑應令

禁林豔裔發青陽春望逍遙出畫堂雨洗亭皋千畝綠
風吹梅李一園香鶴飛不去隨清管魚躍翻來入綵航
睿賞歡承天保定邁文更覩日重光

墨令答讚

四言

入相論道資孝爲忠朗如明鏡穆如清風旣調節鶴又

擅雕龍有則有典是爲文雄

張說之文集卷第一

張說之文集卷第二

雜詩

御製喜雪

奉和應制

御製同劉晃喜雨

奉和應制

御製遊興慶宮作

并序

奉和應制

御製觀拔河

奉和應制

奉和寒食作應制

御製過大哥宅

奉和應制

御製過大哥山池

二首

奉和應制

御製石橋銘

四言

奉和應制

御製賜諸州刺史

奉和應制

御製賜崔日知

奉和應制

御製餞王峻巡邊

奉和應制

奉和送宇文融應制

御製興慶宮酺宴

并序

奉和應制

御製春晚宴兩相

并序

侍宴應制探得開字

御製花萼樓下宴

并序

奉和應制

御製端午宴羣臣

并序

端午侍宴應制探得魚字

御製千秋節宴

并序

奉和應制

御製千秋節賜羣臣鏡

奉和應制

喜雪

御製

日觀卜先征將巡順物情風行未備禮雲密遽飄霏委

樹寒花發縈空落絮輕朝如玉已會庭似月猶明既覩
膚先合還欣只有盈登封何以報因此謝功成

奉和喜雪應制

聖德與天同封巒欲報功詔書斯日下靈感應時通觸
石雲呈瑞含花雪告豐積如沙照月散似麩從風舞集
仙臺上歌流帝樂中遙知百神喜灑路待行宮

同劉晃喜雨

御製

節變寒初盡時和氣已春繁雲先合寸膏雨自依旬颯
颯飛平野霏霏靜暗塵懸知花葉意朝夕望中新

奉和同劉晃喜雨應制

青氣含春雨知從岱嶽來行雲避師出洒雨待車迴馱

泥塵清道空濛柳映臺最宜三五夜晴月九重開

遊興慶宮作

并序

御製

暇日與兄弟同遊興慶宮登勤政務本及華萼相輝之樓所以觀風俗而勸人崇友于而敦睦詩以言志歌以詠言情發於衷率題此什

代邸青門右離宮紫陌垂庭如過沛日水若渡江時綺觀連雞岫朱樓接雁池從來敦棣萼今此茂荆枝萬葉傳餘慶千年志不移凭軒聊屬目輕輦共追隨務本方崇訓相輝保羽儀時康俗易漸德薄政難施鼓吹迎飛蓋絃歌送羽卮所希覃率土孝悌一同規

奉和暇日遊興慶宮作應制

漢武橫汾日周王宴鎬年何如造區夏復此睦親賢巢
鳳新成閣飛龍舊躍泉棣華歌尙在桐葉戲仍傳禁籞
氛埃隔平臺景物連聖慈良有裕王道固無偏問俗兆
人阜觀風五教宣獻圖開益地張樂奏鈞天侍酌衢樽
滿詢芻諫鼓懸詠言形友愛萬國共周旋

觀拔河俗傳此戲必致年豐故命北軍以求歲

稔御製

壯徒恒賈勇拔拒抵長河欲練英雄志須明勝負多譟
齊山岌業氣作水騰波預期年歲稔先此樂時和

奉和觀拔河應制

今歲好拖鉤橫街敞御樓長繩繫日住貫索挽河流鬪

力頻催鼓爭都更上等春來百種戲天意在宜秋

奉和寒食作應制

寒食春過半花濃鳥復嬌從來禁火日會接清明朝
鬪敵雞殊勝爭毬馬絕調晴空數雲點香樹百風搖
改木迎新燧封田表舊燒皇情愛嘉節傳曲與簫韶

過大哥宅探得歌字

御製

魯衛情先重親賢愛轉多冕旒豐暇日乘景暫經過
戚里申高宴平臺奏雅歌復尋爲善樂方驗保山河

奉和過(甯)王宅應制

進酒忘憂觀簫韶喜降尋帝堯敦族禮王季友兄心竹
苑龍鳴笛梧宮鳳繞林大風將小雅一字盡千金

同玉真公主過大哥山池二首

御製

澄潭皎鏡石崔嵬萬壑千巖暗綠苔
林亭自有幽真趣況復秋深爽氣來

地有招賢處人傳樂善名
鶩池臨九達龍岫對重城桂
月先秋冷蘋風向晚清
鳳樓遙可見髣髴玉簫聲

奉和同玉真公主遊大哥山池題石壁應制

首二

池如明鏡月華開山學香鑪雲氣來
神藻飛爲鵲鶴賦仙聲颺出鳳凰臺

綠竹初成苑丹沙欲化金
乘龍與驂鳳歌吹滿山林
爽氣凝情迴寒光映浦深
忘憂題此觀爲樂嘗同心

石橋銘

四言

御製

梁園勝躅碣館佳遊苔深石暗山斜路幽橋非七夕節
是三秋爰停弄杼共此淹留

奉和石橋銘應制

玉梁架迴碧沼涵空石鞭海上鎖鍛河中橫漢飛鵲規
天拖虹仙聖來往風雲路通

賜諸州刺史以題座右

御製

眷言思共理鑑寢想惟良猗歟此推擇聲績著周行賢
能旣俟進黎獻實仁康視人當如子愛人亦如傷講學
試誦論阡陌勸耕桑虛譽不可飾清知不可忘求名迹
易見安真德自彰獄訟必以情教民貴有常恤憚且存
老撫弱復綏強勸哉各祇命知予眷萬方

奉和賜諸州刺史應制

文明徧禹跡，鰥寡達堯心。正在親人守，能令王澤深。朝
廷多秀士，鎔鍊比精金。犀節同分命，熊軒各外臨。聖主
賦新詩，穆若聽薰琴。先言教爲本，次言則是欽。三時農
不奪，午夜犬無侵。願使天宇內，品物遂浮沈。寄情羣飛
鶴，千里一揚音。共躡華胥夢，龔黃安足尋。

賜崔日知往潞州

御製

潞國開新府，壺關寵舊臨。妙旌循吏德，特悅庶民心。禮
樂中朝貴，仁明列郡欽。揚風非贈扇，易俗是張琴。蕃鎮
謳謠洽，行宮雨露深。會書丞相策，先賜潁川金。

奉和賜崔日知應制

聖情留曩鎮佳氣翊興王增戟雄都府高車轉太常川
橫八諫闕山帶五龍長連帥初恩命天人舊紀綱餞塗
飛御藻闔境自生光明主徵循吏何年下鳳凰

餞王峻巡邊

御製

振武威荒服揚文肅遠墟金壇申將禮玉節授軍符冠
冑三方外銜刀萬里餘昔時吳會靜今日虜庭虛分閫
仍推轂援桴且訓車風揚旌旆遠雨洗甲兵初坐見台
階謚行聞祓禳除檄來雖插羽箭去亦飛書舟楫功斯
著鹽梅望匪疏不應陳七德欲使化先敷

奉和送王峻巡邊應制

六月歌周雅三邊諗夏卿欲施攻戰法先作簡稽行禮

樂知謀帥春秋識用兵一勞堪定國萬里卽長城策有
和戎利威傳破虜名軍前雨灑道樓上月臨營別藻瑤
華降同衣錦褫榮關山由義近戈甲爲恩輕絲竹路傍
散風雲馬上生朝廷謂吉甫邦國望君平

奉和送宇文融安輯戶口應制

至德臨天下勞情徧九圍念茲人去本蓬轉將何依外
避征戍數內傷親黨稀嗟不逢明盛胡能照隱微柏臺
簡行李蘭殿錫朝衣別曲動秋風恩令生春輝使出四
海安詔下萬心歸乍無夔龍佐徒歌鴻雁飛

春中興慶宮酺宴

并序

御製

夫抱器懷才含仁蘊德可以坐而論道者我於是乎闢

重門以納之作扞四方折衝萬里可運籌帷幄者我於是乎懸重祿以待之是故外無金革之虞朝有搢紳之盛所以巖廊多暇垂拱無爲不言而海外知歸不教而寰中自肅元亨之道其在茲乎況乎天地交而萬物通陰陽和而四時序所寶者粟所貴者賢故以宵旰爲懷黎元在念盡力溝洫不知宮室之已卑致敬鬼神不知飲食之斯薄往以仲冬建子南至初陽爰詔司存式陳郊祀挹夷夏之誠請答人神之厚睠煙歸太乙禮備上玄足以申昭報之情足以極嚴禋之道然心融萬類歸雷雨之先春慶洽百寮象雲天而高宴歲二月地三秦水汎汎而龍池滿日遲遲而鳳樓曙青門左右軒庭映

梅柳之春紫陌東西
帟幕動煙霞之色
撞鐘伐鼓雲起
雪飛歌一聲而酒一盃
舞一曲而人一醉
詩以言志思
吟湛露之篇樂以忘憂
慙運臨汾之筆

九達長安道三陽別館
春還將理朝暇迴作豫遊
辰不戰要荒服無刑禮樂
新合醑覃土宇歡宴接羣臣
玉學飛千日瓊筵薦八珍
舞衣雲曳影歌扇月開輪
伐鼓魚龍雜撞鐘角觝陳
曲終酣興晚須有醉歸人

奉和春中興慶宮醑宴應制

千齡逢啟聖萬域共來威
慶接郊禋後醑承農事稀
御樓橫廣路天樂下重闈
鸞鳳調歌曲虹霓動舞衣
合聲雲上聚連步月中歸
物覩恩無外神和道入微
鎬京陪

樂飲柏殿奉文飛徒竭秋螢影何資春日暉

春晚宴兩相及禮官麗正殿學士

并序

御製

朕以薄德祇膺麻數正天柱之將傾紉地維之已絕故
得承奉宗廟垂拱巖廊居海內之尊處域中之大然後
祖述堯典憲章禹績敦睦九族會同四海猶恐烝黎未
乂徭戍未安禮樂之政虧師儒之道喪乃命使者衣繡
服行郡縣因人所利擇其可勞所以便億兆也乃命將
士擐甲胄冒矢石審山川之向背應歲月之孤虛所以
靜邊陲也乃命禮官考制度稽典則序文昭武穆享天
地神祇所以申嚴潔也乃命學者繕落簡緝遺編纂魯
壁之文章綴秦坑之煨燼所以修文教也故能使流寓

返枌榆之業戎狄稱藩屏之臣神祇歆其禋祀庠序闡
其經術旣家六合時巡兩京函秦則委輸斯遠鼎邑則
朝宗所利封畿四塞從來測景之都城闕千門自昔交
風之地陰陽代謝日月相推豈可使春色虛捐韶華坐
歇乃置旨酒命英賢有文苑之高才有掖垣之良佐舉
盃稱慶何樂如之同吟湛露之篇宜振淩雲之藻于時
歲次乙丑開元十三年三月二十七日

乾道運無窮恆將人代工陰陽調麻象禮樂報玄穹介
胄清荒外衣冠佐域中言談延國輔詞賦引文雄野霽
伊川綠郊明鞏樹紅冕旒多暇景詩酒會春風

侍宴探得開字

聖政惟稽古賓門引上才坊因購書立殿爲集賢開髦
彥星辰下仙章日月迴字如龍負出韻是鳳銜來庭柳
餘春駐宮櫻早夏催喜承芸閣宴幸捧柏梁杯

夏首花萼樓觀羣臣宴甯王山亭迴樓下又申

之以賞樂賦詩

并序

御製

萬物莫不氣兆乎上而形視乎下鐵石異品雲蒸並溼
草木無心春來咸喜故聖人弘道先王法天酒星主獻
醕之義需卦陳飲食之象近命羣官欣時樂宴盡九春
之麗景弔三旬之暇日暢飲桂山權歌沁水醇以養德
味以平心本將導達陽和助成長育亦朝廷多慶軍國
餘閒者也前月之晦細風飄雨繁絃中止列席半醉佳

辰易失絕興難追良可惋也今年帶閏節候全晚暑氣
猶清芳草未歇申布雅意復敘初筵披樂善之邸坐忘
憂之觀東郊跬步南山在目足以締夏首之新賞補春
餘之墜歡朕登覽上宮俯臨長陌暢眾心之怡虞權歸
騎之逶迤鼓之以瑟琴宥之以筐篚衢樽意洽場藿思
苗賦我有嘉賓之詩奏君臣相悅之樂踟躕西日吟翫
南風不知哀情發於翰墨也

今年通閏月入夏展春輝樓上風花晚城隅宴賞歸九
歌揚政要六舞散朝衣天喜時相合人知事不違禮中
推意厚樂處感心微別賞陽臺樂前旬暮雨飛

奉和花萼樓下宴應制

萬心翹樂宴三舍緩昌時山接夏雲險臺留春日遲節
移芳未歇興隔賞仍追醉後傳嘉惠樓前舞聖慈皇恩
與時合天意若人期故發前旬雨新垂湛露詞

端午三殿宴羣臣

并序

御製

律中蕤賓獻疇之象著火在盛德文明之義燁故以式
宴陳詩上和下暢者也朕宵衣旰食緝聲教於萬方卜
戰行師總兵鈐於四海勤貪日給憂忘心勞聞蟬聲而
悟物變見槿花而驚候改所賴濟濟朝廷視成鷓鴣桓
桓邊塞責辦熊羆喜麥秋之有登玩梅夏之無事時雨
近霽西郊霾靡而一色炎雲作峯南山嵯峨而異勢正
當召儒雅宴高明廣殿肅而清陰生列樹深而長風至

廚人嘗散熱之饌酒正行逃暑之飲庖捐惡鳥俎獻肥
龜新筒裹練香蘆角黍恭儉之儀有序慈惠之意溥洽
諷味黃老致息心於眞妙抑揚游夏滌煩想於詩書超
然玄覽自足爲樂何止柏枕桃門驗方術於經紀綵花
命縷觀問遺於風俗感婆娑於孝女憫枯槁之忠臣而
已哉歎節氣之循環美君臣之相樂凡百在會咸可賦
詩五言紀其日端七韻成其火數豈獨漢武之殿盛朝
士之連章魏文之臺壯辭人之並作云爾

五月符天數五音調夏鈞舊來傳五日無事不稱神宓
枕通靈氣長絲命續人五時花競巧九子糗爭新方殿
臨華節圓宮宴雅臣進對一言重適文六義陳股肱良

足詠風化可還消

端午三殿侍宴應制探得魚字

小暑夏絃應微陰商管初願齊長命縷來續大恩餘三
殿褰珠箔羣官上玉除助陽嘗黍菝順節進龜魚甘露
垂天酒芝花捧御書合丹同蠓蜒灰骨共蟾蜍今日傷
虵意銜珠遂闕如

千秋節宴

并序

御製

令節肇開情兼感慶率題八韻以示羣臣

蘭殿千秋節稱君萬壽觴風傳率土慶日表繼天祥玉
宇開花萼金懸動會昌衣冠白鷺下帟幕翠雲長獻遺
成新俗朝儀入舊章月銜花綬鏡露綴絲絲囊處處祠

田祖年年宴杖鄉深思一德事小獲萬人康

奉和千秋節宴應制

五德生王者千齡啟聖人赤光來照夜黃雲上覆晨海
縣銜恩久朝章獻壽新高居帝座出夾道眾官陳禦仗
洗清景磬管凝秋良珠囊含瑞露金鏡抱僊輪何歲無
鄉飲何田不報神薰歌與名節傳代幸羣臣

千秋節賜羣臣鏡

御製

鑄得千秋鏡光生百鍊金分將賜羣后遇象見清心臺
上冰華澈窗中月影臨更銜長綬帶留意感人深

奉和賜王公千秋鏡應制

寶鏡頒神節凝規寫聖情千秋題作字長綬帶爲名月

向天邊下花從日裏生不承懸象意誰辨照心明

張說之文集卷第二

張說之文集卷第三

雜詩

御製太行山中言志

奉和應制

苗晉卿同作

御製巡省途次舊居

并序

奉和應制

御製過晉陽宮

奉和應制

御製早度蒲關

奉和應制

御製入秦路逢寒食

奉和應制

御製途中經華嶽

奉和應制

御製潼關口號

奉和應制

御製過王濬墓

奉和應制

御製經河上公廟

奉和應制

御製途次陝州

奉和應制

御製行次成皋

奉和應制

御製祭孔子

奉和應制

御製野次喜雪

奉和應制

御製溫湯對雪

奉和應制

御製溫泉言志

奉和應制

御製校獵義成喜雪

奉和應制

御製幸鳳湯泉

奉和應制

扈從溫泉宮獻詩

直宿溫泉宮羽林獻詩

王太尉碑

①玄武門侍射

并序

早登太行山中言志

御製

清蹕渡河陽，疑笳上太行。
火龍明鳥道，鐵騎繞羊腸。
白露霾陰壑，丹霞助曉光。
澗泉含宿凍，山草帶餘霜。
野老茅爲室，樵人薜作裳。
宣風問耆艾，敦俗勸耕桑。
涼德慙先哲，徽猷慕昔皇。
不因今展義，何必冒垂堂。

奉和太行山中言志應制

六龍鳴玉鑿，九折步雲端。
河眷南浮近，山輕北上難。
羽儀映松雪，戈甲帶春寒。
百谷晨笳動，千巖曉仗攢。
皇心感韶節，敷藻念人安。
旣立省方館，復置建神壇。
扈蹕參天老，承榮忝夏官。
長勤百年意思，見一勝殘。

同前

苗晉卿

金吾戒道清，羽騎動天聲。
砥路方南絕，重巖始北征。
關

樓前望遠河邑下觀平喜氣迴輿合祥風轉旆輕祝堯
三老至會禹百神迎月令農先急春蒐禮復行仍親后
土祭更理晉陽兵不似勞車轍空留八駿名

爰因巡省途次舊居

并序

御製

朕昔在初九佐貳此州未遇扶搖之力空俟海沂之詠
洎大橫入兆出處斯易一揮寶劍遽履瑤圖承^麻數而
順謳謠著天衣而御區夏嗟乎向時沈默駕四馬而朝
京師今日逍遙乘六龍而問風俗爰因巡省途次舊居
山川宛然人事無間忽其鼎革周遊館宇觸目依然雖
迹異漢皇而地如豐邑擊筑慷慨酌桂留連空想大風

題茲短什

三千初擊浪九萬欲搏空天地猶驚否陰陽始遇蒙存
身斯歷試佐貳伋昭融多謝時康理良慚寶劍功長懷
問鼎氣夙負拔山雄不學劉琨舞先歌漢祖風英髦旣
包括豪傑自牢籠人事一朝異謳謠四海同如何昔朱
邸今此作離宮鴈沼澄瀾翠猿巖落照紅小山餘桂馥
長坂舊蘭叢卽是淹留處乘歡樂未窮

奉和爰因巡省途次舊居應制

蔥鬱興王郡殷憂啟聖圖周成會西土漢武幸南都歲
卜鑾輿邁農祠雁政敷武威稜外域文教靡中區警蹕
千戈捧朝宗萬玉趨舊藩人事革新禮國容殊壁有眞
龍畫庭餘鳴鳳梧藂觴祝堯壽合鼎獻湯廚陽樂寒初

變春恩蟄更蘇三耆頒命服五稔復田輸君賦大風起
人歌湛露濡從臣觀玉葉方願紀靈符

過晉陽宮

御製

緬想封唐處實惟建國初俯察伊晉野仰觀乃參墟井
邑龍躍斯城池鳳翔餘林塘猶沛澤臺榭宛舊居運革
祚中否時遷命茲符願循承丕構忱惕多憂虞尙恐威
不逮復慮化未孚豈徒勞轍跡所期訓戎車習俗問黎
人親巡慰里閭永言念成功頌德臨康衢長懷經綸日
歎息履庭隅艱難安可忘欲去良踟躕

奉和

太原俗尙武高皇初奮庸星軒三晉躔土樂二堯封北

風遂舉鵬西河亦上龍至德起王業繼明賴人雍六葉
啟昌期再興廣聖蹤傳呼大駕來文物如雲從連營火
百里縱觀人千重翠華渡汾水白日臨峯峯枌榆恩賞
洽桑梓舊情恭往運感不追清時惜難逢詩發尊祖心
頌刊盛德容願君及春事迴輿綏萬邦

早度蒲關

御製

鐘鼓嚴更曙山河野望通鳴鑾下蒲阪飛旆入秦中地
險關逾壯天平鎮尙雄春來津樹合月落戍樓空馬色
分朝景雞聲逐曉風所希常道泰非復俟繻同

奉和

蒲阪橫臨晉華芝曉望秦關城雄地險橋路扼天津樓

映行宮日隄含宮樹春黃雲隨寶鼎紫氣逐真人東詠
唐虞跡西觀周漢塵山河非國寶明主愛忠臣

初入秦川路逢寒食

御製

洛川芳樹映天津灞岸垂楊宰地新直爲經過行處樂
不知虛度兩京春去年有閨今春早曙色和風著花草
可憐寒食與清明光輝併在長安道自從關路入秦川
爭到何人不戲鞭公子途中方蹴踘佳人馬上廢鞦韆
渭水長橋今欲渡蔥蔥漸見新豐樹遠看驪岫入雲霄
預想湯池起煙霧煙霧氛氲水殿開暫拂香泉歸去來
今歲清明行已晚明年寒食更相陪

上陽柳色喚春歸
臨渭桃花拂水飛
總爲朝廷巡幸去
頓教京洛少光輝
昨從分陝山南口
馳道依依漸花柳
入關正投寒食前
還京遂落清明後
路上天心重豫遊
御前恩賜特風流
便幕那能鏤雞子
行宮善巧帖毛毬
渭橋南渡花如撲
麥隴青青斷人目
漢家行樹直新豐
秦地驪山抱溫谷
香池春溜水初平
預歡浴日照京城
今歲隨宜過寒食
明年陪宴作清明

途中經華嶽

御製

飭駕去京邑
鳴鑾指洛川
循途經太華
迴蹕暫周旋
翠嶠留斜影
懸巖冒夕煙
四方皆石壁
五位配金天
髣髴看高掌
依稀聽子先
終當銘歲月
從此記靈仙

奉和

西嶽鎮皇京中峯入太清玉鑿重嶺應緹騎薄雲迎霽
日懸高掌寒空映削成軒遊會神處漢幸望仙情舊廟
青林古新碑綠字生羣臣願封岱還駕勒鴻名

潼關口號

御製

河曲迴千里關門限二京所嗟非恃德設險致天平

奉和

天德平無外關門東復西不將千里隔何用一丸泥

過王濬墓

御製

吳國分牛斗晉室命龍驤受任敵已滅策勳名不彰居
美未盡善矜功徒自傷長戟今何在孤墳此路傍不觀

松柏茂空餘荆棘場歎嗟懸劍隴誰識夢刀祥

奉和

牛斗三分國龍驤一統年智高甯受制風急肯迴船有
策擒吳韜無言讓范宣援孤因勢屈功重爲讒偏舊跡
灰塵散枯墳故老傳百代逢明主何辭死道邊

經河上公廟

御製

昔聞有耆叟河上獨遺榮迹與囂塵隔心將道德并詎
以天地累甯爲寵辱驚矯然翔寥廓如何屈堅真玄
妙門啟肅肅祠宇清冥冥無先後那能記姓名

奉和

河上無名老知非漢代人先探道德要留待聖明辰玄

妙爲天下清虛用谷神化將和氣一風與太初鄰靈廟
觀遺像仙歌入至真皇心齊萬物何處不同塵

途次陝州

御製

境出三秦外途分二陝中山川入虞虢風俗限西東樹
古棠陰在耕餘讓畔空鳴笳從此去行見洛陽宮

奉和

周召嘗分陝詩書空復傳何如萬乘睠追賞二南篇郡
帶洪河側宮臨大道邊洛城將日近佳氣滿山川

行次成皋途經先聖擒建德之所緬懷功業感

而賦詩

御製

有隋政昏虐羣雄已交爭先聖按劍起叱咤風雲生飲

馬河洛竭作氣嵩華驚克敵睿圖就擒俘帝道亨顧慙
嗣寶^麻恭承天下平幸過翦鯨地感慕神且英

奉和

夏氏階隋亂自言河朔雄王師進穀水兵氣臨山東前
埽成皋陣卻下洛陽宮義合帝圖起威加天宇同軒臺
百年外虞典一巡中戰龍思王業倚馬賦神功

經鄒魯祭孔子而歎之

御製

夫子何爲者栖栖一代中地猶鄒氏邑宅卽魯王宮歎
鳳嗟身否傷麟怨道窮今看兩檻奠當與夢時同

奉和

孔聖家鄒魯儒風藹典墳龍驂迴舊宅鳳德詠餘芬入

室神如在升堂樂似聞懸知一王法今日待明君

野次喜雪

御製

拂曉闢行宮寒皋野望通繁雲低遠岫飛雪舞長空賦
象恆依物縈迴屢逐風爲知勤恤意先此示年豐

奉和

寒更玉漏催曉色御前開泱泱雲陰積氤氳風雪迴山
如銀作甕宮見壁成臺欲驗豐年象飄颻仙藻來

溫湯對雪

御製

北風吹同雲同雲飛白雪白雪乍迴散同雲何慘裂未
見溫泉冰甯知火井滅表瑞良在茲庶希可怡悅

奉和

瑞雪帶寒風寒風入陰瑁陰瑁方凝閉寒風復淒斷宮
似瑤林市庭如月華滿正歎挾纒詞非近湯泉暖

惟此溫泉是稱愈疾豈予獨受其福思與兆人
共之乘暇巡遊乃言其志

御製

桂殿與山連蘭湯湧自然陰崖含秀色溫谷吐潺湲績
爲蠲邪著功因養正宣願言將億兆同此共昌延

奉和

溫谷媚新豐驪山橫半空湯池薰水殿翠木暖煙宮起
疾逾仙藥無私合聖功始知堯舜德心與萬人同
校獵義成喜逢天雪率題九韻以示羣官

御製

聖
三
五
十
四
孤矢威天下旌旗遊近縣一面施烏羅三驅教人戰暮
雲成積雪曉色開行殿皓然原隰同不覺林野變北風
勇士馬東日華組練觸地銀麈出連山縞鹿見月兔落
高矰星狼下飛箭旣欣盈尺兆復憶磻溪便歲豐將遇
賢俱荷皇天眷

奉和

文教資武功郊畋閱邦政不知仁育久徒看禽獸盛夜
霰氛埃滅朝日山川靜綽仗飛走繁抨弦筋角勁帝射
參神道龍馳合人性五豨連一發百中皆先命勇爵均
萬夫雄圖羅七聖星爲吉符老雪作豐年慶喜聽行獵

詩威神入軍令

幸鳳湯泉

御製

西狩觀周俗南山歷漢宮
薦鮮知路近省斂覺年豐
陰谷含神爨湯泉養聖功
益齡仙井合愈疾醴源通
不重鳴岐鳳誰憐陳寶雄
願將無限澤霑沐眾心同

奉和

周狩聞岐禮秦都辨雍名
獻禽天子孝存老聖皇情
溫潤宜冬幸遊畋樂歲成
湯雲出水殿煖氣入山營
坎意無私結乾心稱物平
帝歌流樂府溪谷也增榮

扈從溫泉宮獻詩

溫泉啟蟄地氛氳渭浦歸鴻日
數羣騎仗聯聯環北極
鳴笳步步引南薰松間彩殿籠
佳氣山上朱旗繞瑞雲

不知遠夢華胥國何如親奉帝堯君

直宿溫泉宮羽林獻詩

冬狩美秦正新豐樂漢行星陳
武閣月對羽林營寒
木羅霜仗空山響夜更恩深靈液暖節效古松貞文武
皆王事輸心不爲名

羽林恩召觀御書王太尉碑

隴首名公石來承聖札歸魚籠生意態鉤劍動鎡輝字
得神明保詞慙少女徽誰家羽林將文逐鳳書飛

武門侍射 并序

開元之初季冬其望天子始御北闕朝羽林軍禮修事
厥後二日乃命紫微黃門九卿六事與熊羆之將爪牙

之臣合宴焉侑以純錦頌以珍品爾其射弮新成大侯
既設槊仗林立帷軒霧布眾官半醉皇情載悅卷珠箔
臨玉除唐弓在手夏箭斯發應絃命中屬羽連飛弧矢
以來未之有也若夫天地合道星辰獻儀端視和容內
正外直自近而制遠耀威而觀德思無不通神無不極
用是射也其惟聖人乎于時繁雲覆城大雪飛苑天人
同澤上下交懽退食懷恩賦詩頌義凡若干篇

射觀通玄闕兵闕闕御筵雕弧月半上畫的暈重圓羿
后神幽贊靈王法暗傳貫心精四返飲羽妙三聯雪鶴
來銜箭星麟下集弦一逢軍宴洽萬慶武功宣

張說之文集卷第三

張說之文集卷第四

雜詩

雀鼠谷

御製答張說雀鼠谷

奉和

宋璟

蘇頌

王邱

袁暉

崔翹

張九齡

御製送張說巡邊

奉敕餞張尙書序

賈曾

將赴朔方軍應制

奉和

源乾曜

張嘉貞

許

景光

韓休

徐知仁

崔禹錫

王翰

蘇晉

王光庭

御製送張說賜讌

奉敕送張說賜讌序

張九齡

奉和聖製送赴集賢院

奉和

源乾曜

裴淮

蘇頌

李嵩

蕭嵩

李元紘

賀知章

陸堅

劉

昇

王翰

趙冬曦

韋述

蘇晉

御製命宴東堂賜詩

命宴序

蘇晉

奉和命宴東堂賜詩應制

奉和 宋璟 源乾曜 蕭
嵩 裴光庭 宇文融

奉酒三首

御製宴樂游園

奉和樂游園宴應制

奉和 宋璟 崔沔 張九齡 胡皓 王翰

崔尚 趙冬曦

扈從南出雀鼠谷

豫動三靈贊時巡四海威
硤關凌曙出平路半春歸
霍鎮迎雲罕汾河送羽旂
山南柳半密谷北草全稀
遲日宜華蓋和風入夾衣
上林千里近應見百花飛

答張說南出雀鼠谷

御製

雷出膺乾象風行順國人
川途猶在晉車馬漸歸秦
背陝關山險橫汾鼓吹頻
草依陽谷變花待北巖春
聞有

鵷鷺客清詞雅調新求音思欲報心迹竟難陳

奉和聖答張說南出雀鼠谷

宋璟

秦地雄西夏并州近北胡禹行山啟路王在邑爲都忽
視寒暄隔深思險易殊四時宗伯敘六義宰臣鋪徵作
宮常應星環日每紆盛哉逢合道良以致亨衢

同前

蘇頲

雨施巡方罷雲從訓俗迴密途汾水衛清蹕晉郊陪寒
著山邊靜春當日下來御祠（玄）鳥應仙仗綠楊開作頌
音傳雅觀文色動台更知西向樂宸藻協鹽梅

同前

王邱

襟帶三秦接旂裳萬乘過陽源淑氣早陰谷沍寒多花

張四
三ノ七十一ス
縵前茅仗霜嚴後殿戈戍雲開晉嶺江雁入汾河北土
分堯俗南風動舜歌一聞天樂唱恭逐萬人和

同前

袁暉

魏國山河險周王警蹕迴九旗雲際出萬騎谷中來石
岸行將盡煙郊望忽開賞矜垂柳拂春畏落花催興逸
橫汾體恩褻作頌才小臣瞻日月延首詠康哉

同前

崔翹

峽路繞河汾晴光拂曙氛笳吟中嶺樹仗入半峯雲頓
覺山原盡平君邑里分早行芳草未晚憩好風薰嘉頌
推英宰春遊扈聖君共欣承睿渥日月照天文

同前

張九齡

設險諸侯地承平聖主巡東君朝二月南旆擁三辰寒
出重關盡年隨行漏新瑞雲叢捧日芳樹曲迎春舞詠
先馳道恩華及從臣汾川花鳥意併奉屬車塵

同前 王光庭

省俗恩將徧巡方路稍迴寒隨汾谷盡春逐晉郊來雲
騎傳行漏煙旄引從臺惠風初應律和氣正調梅雅頌
通宸禁天文接曙台灞陵桃李色應待日華開

同前 席豫

鳴鑾初幸代旋蓋欲橫汾山盡千旗出郊平五校分前
林已暄景後壑尙寒氛風送簫韶曲花鋪黼黻文鹽梅
推上宰禮樂統中軍獻賦紆天札飄飄飛白雲

同前

梁昇卿

何忽重關道千年遇聖皇
幽林承惠澤閑谷見清光
日御先途遠山靈獻壽長
寒雲入晉薄春樹隔汾香
國佐同時雨天文屬歲陽
從來漢家盛未若此巡方

同前

趙冬曦

軒轅應順動方牧正趨陪
道合殷爲礪時行楚有材
省方西禮設振旅北方迴
地理分中壤天文照上台
寒依汾谷去春入晉郊來
竊比康衢者長歌仰大哉

送張說巡邊

御製

端拱復垂裳長懷御遠方
股肱申教義戈劍靜要荒
命將綏邊服雄圖出廟堂
三台入武帳八座起文昌
寶胄

匡韓主華宗輔漢王茂先慙博物平子謝文章盡節恢
時佐輸誠禦寇場三軍臨朔野駟馬卽戎行鼓吹威夷
狄旌軒溢洛陽雲臺先著美今日更貽芳

餞張尙書赴朔方序

賈曾奉

敕撰

王者大司馬制軍詰禁封國正朔惠綏蠻貊刑齊猾夏
其儀尙矣天子道穆三象功清六合截海來威窮荒揆
教將以靜流服度藩畿削憚疑凌暴昭蘇寡弱乃命元
宰兵部尙書燕公專節朔方授律羣帥涉河之外距關
之西公皆統之重分闡也公智以開物精以造微文爲
一變之英武有萬人之敵歷登庶尹王猷載甯三宅台
衡帝采惟亮雖坐堂足以制勝而勤國忘其定居闡茂

次年仲皋貞閏拜手東洛馳輶北闕備官而行成旅以
從是日也景風司至星火殷宵伯趙鳴而戒陰爽鳩習
而揚武賦可以昇高遠望詩可以出宿餞行有詔具寮
爰開祖宴且申後命寵以蕃錫天章賦別御札題牋副
衣勉挾纊之誠兼壺喻投醪之旨筐篚以將其貺筆硯
以表其文前載未書今冊斯覩侍中安陽公以仁體國
中書令河東公以德熙朝燮贊功成訐謀景暇慕采薇
之興典悵伐木之朋思詢彼之師卜茲郊候鼎門右轉
岐路傍分當闕塞之斷山接華林之高樹幕人宿設重
帟雲平太官饗舉百羞霞錯四夏六脗之變朱干皇羽
之容雷殷川原電燧林薄朝傾多士巷無居人接蓋陰

衢揚袂風野羽觴遞進列座酣而不譁清鏡間發將士
激而逾厲視日知其吉氣吹律驗其商聲則已景列穹
都風騰漠野西域輕郵支之使東胡息冒頓之虞顧夫
南仲于征吉甫薄伐不其遠也若木還照前茅啟行聽
闐闐之去鼓目悠悠之轉旆歌事者每懷靡及念離者
歧予望之成志在心發言同唱天子有命式敘清風請
編出車之什以繼蒸人之雅

將赴朔方軍應制

禮樂逢明主韜鈴用老臣恭憑神武策遠御鬼方人
供帳榮恩餞山川喜詔巡天文日月麗朝賦管絃新幼志
傳三略衰材謝六鈞瞻猶忠作伴心故道爲鄰漢保河

南地胡清塞北塵連年大軍後不日小康辰劍舞輕離
別歌酣忘苦辛從來思博望許國不謀身

奉和聖製送張尙書巡邊

源乾曜

匈奴邇河朔漢地復戎旅天子擇英才朝端出監撫流
星下閭闔寶鉞專公輔禮物生光輝宸意備恩詔有征
示予戟制勝惟樽俎彼美何壯哉桓桓擅斯舉聲華振
臺閣功德標文武奉國知命輕忘家以身許安人在勤
恤保大殫襟腑此外無異言同情報明主

同前

張嘉貞

天錫我宗盟元戎付夏卿多才兼將相必勇獨橫行經
緯稱人傑文章作代英山川看是陣草木想爲兵不待

河冰合猶防塞月明有謀當繫醜無戰且綏氓闔外專
三略雲中冀一平感恩共心盡悵別屢魂驚直視前旌
掣遙聞後騎鳴還期方定日復此出郊迎

同前

宋璟

帝道薄存兵王師尙有征是開司馬法爰命總戎行畫
闔崇威信分麾盛寵榮聚觀方結轍出祖遂傾城聖酒
山河潤天詞象緯明德風邊地偃勝氣朔方平宰國推
良器爲軍挹壯聲至和常得體不戰卽亡精以智泉甯
竭其徐海自清遲還廟堂坐別贈故人情

同前

盧從愿

上將發文昌中軍靜朔方占星引旌節擇日拜壇場禮

樂臨軒送威聲出塞揚安邊俟帷幄制勝在巖廊作鼓
將軍氣投醪戰士觴戒途遵六月離贈動三光槐路清
梅暑蘅皋赴麥涼時文仰雄伯耀武震遐荒衽席知無
戰兵戎示不忘伫聞歌杕杜凱入繫名王

同前

許景光

文武承邦式風雲感國禎王師親賦政廟略久論兵漢
主知三傑周官總六卿四方分闡受千里坐謀成介冑
辭前殿壺觴宿左營賞延頒賜重宸贈出車榮龍武三
軍氣魚鈴五校名郊雲駐旌羽邊吹引金鉦振旅方稱
德安人更克貞伫觀銘石罷同聽凱歌聲

同前

韓休

一德光台象三軍掌夏卿來威申廟略出總協師貞受
鉞辭金殿憑軒去鼎城曉光搖組甲疏吹繞雲旌左律
方先凱中輦卽訓兵定功彰武事陳頌紀天聲祖宴初
留賞宸章更寵行車徒零雨送林野夕陰生路極河流
遠川長朔氣平南轅遲反旆歸奉謁承明

同前

徐知仁

聖德膺三絕皇威被八埏大明均照物小醜未甯邊國
相台衡重元戎廟略宣紫泥方受命黃石乃推賢問罪
陰山下安人屬國前度關行照月乘帳坐銷煙北闕紆
宸藻南橋列祖筵耀威當夏日殺氣指秋天鞞鼓鼉鼉
振旌旗鳥獸懸由來詞翰首今見勒燕然

同前

崔禹錫

供帳何煌煌，公其撫朔方。
羣寮銜餞酌，明主降離章。
關塞重門下，郊岐禁苑傍。
練兵宜雨洗，臥鼓候風涼。
炎景甯云憚，神謀肅所將。
旌搖天月迴，騎入塞雲長。
赫赫皇威震，油油聖澤滂。
非惟按車甲，兼以正封疆。
叱吒陰山道，澄清瀚海陽。
虜垣行決勝，台座伋爲光。

同前

王翰

紫盤尙書印，朱駟丞相車。
登朝身許國，出闕將辭家。
不憚炎蒸苦，親嘗走集賒。
選徒軍有令，誓卒爾無譁。
帝樂風初起，王城日半斜。
寵行流聖作，寅餞照台華。
騎歷河南樹，旌搖天北沙。
榮懷應盡服，嚴殺已先加。
業峻靈祇

保功成道路差甯知鑿空使遠致石榴花

同前

蘇晉

方漢比周年興王令在宣亟聞降虜拜復覩出師篇祈
父萬邦式英猷三略傳算車申夏政芟舍啟戎田嚴問
盟胡苑軍容濟洛川皇情悵關旆詔餞列郊筵路接禁
園草池分御井蓮離聲軫去角居念斷歸蟬三捷豈云
永七擒良信然具寮有誠寄望凱秋風前

同前

王光庭

賢相德符充朝推文武雄海波先若鏡關草預從風鉞
助將軍勇威成天子功瓊章九霄發錫宴五衢通玉輶
龍盤帶金裝鳳頸驄虎貔紛儼儼河洛震熊熊戈劍干

霜白旌旗萬火紅
示刑夷夏變流惠
鬼神同寇息軍容
偃塵銷朔野空用
師敷禮樂非是爲
獯戎

同前

袁暉

出師宣九命分闡用
三台始應幕中畫
言從天上來丹青不
獨任韜略遂雙該
坐見威稜洽彌彰
事業恢旌旗曉霜送
鞞鼓朔風催虜氣銷
殘月邊聲韻落梅
羽書雄北地龍漢寢
南垓寵戰黃金盡
輸誠白日迴離章宸
翰發祖宴國門開
欲識恩華盛平生
文武材

同前

席豫

聖帝重兵權分麾屬
大賢中軍仍執政
丞相復巡邊翕習
戎裝動張皇廟略
宣朝榮承睿札野
餞轉行旃亭障

東緣海沙場北際天春冬見嚴雪朝夕候烽煙已勒燕山頌猶聞遣戍篇五營將月合八陣與雲連經略圖方遠懷柔道更全歸來畫麟閣藹藹武功傳

同前

張九齡

宗臣事有征廟算在休兵天與三台座人當萬里城朔南方偃革河右誓揚旌寵錫從仙禁光華出漢京山川勤遠略原隰軫皇情爲動薰琴唱仍題寶劍名聞風六郡勇計日五戎平山甫歸應疾留侯功復成歌鍾旋可望枕席豈難行四牡何時入吾君憶履聲

同前

徐堅

至德撫遐荒神兵赴朔方帝思元帥重爰擇股肱良累

相承開地深籌協子房寄崇專斧鉞禮備設壇場鼙鼓
喧雷電戈劍凜風霜四騏將戒道十乘啟先行聖錫加
恆數天文曜寵光出郊開帳飲寅餞盛離章雨濯梅林
潤風吹麥野涼燕山應勒頌麟閣仁名揚

同前

崔日用

軒相推風后周官重夏卿廟謀能允迪韜略又縱橫吉
日四黃馬宣王六月兵擬清雞鹿塞先指朔方城列將
懷威撫匈奴畏盛名去當推轂送來仁出郊迎絕漠蓬
將斷華筵權正榮壯心看舞劍別緒應懸旌睿錫承優
旨乾文復寵行暫勞期永逸赫矣振天聲

同前

賀知章

荒憬盡懷忠梯杭已自通九攻雖不戰五月尙持戎遣
戍徵周牒恢邊重漢功撰車命元宰授律取文雄胄出
天弧上謀成帝幄中詔旂分夏物專謝錫唐弓帳宿伊
生疑右鉦吹晉苑東饗人籍蕢實樂正理絲桐岐陌涵
餘雨離川照晚虹恭聞詠方叔千載舞皇風

送張說上集賢學士賜讌得珍字

御製

廣學開書殿崇儒引席珍集賢招袞職論道命台臣禮
樂沿今古文章革舊新獻酬尊俎列賓主位班陳節變
雲初夏時移氣尙春所希光史冊千載仰茲晨

集賢殿書院奉敕送學士張說上賜讌序

張九齡

集賢殿者本集仙殿也上不以惟睿作聖而猶垂意好
學用相必本於經術圖王亦始於師臣及乎鴻生碩儒
博聞多識之士自開元肇建以迄於今大用徵集煥乎
廣內而聽政餘暇式燕在茲忠臣嘉賓得盡心之所聰
明文思有光被之德故下以道親上亦歡甚卽於御座
爰發德音以爲候彼神人事雖千載傳於方士言固不
經遂改仙爲賢去華務實且有後命增其學秩是以集
賢之廷更爲論思之室矣中書令燕國公外弼庶績以
奉沃心之謀內講六經以成潤色之業故得出入華殿
師長翰林惟帝用臧固天所賴拜命之日荷寵有加降
聖酒之釁下御廚之膳食以樂侑人思德飽時則有侍

中安陽公等承恩預焉學士右散騎常侍東海公等攝
職在焉或禹稷大賢泉雲諸彥文王多士周室以甯武
帝得人漢家爲盛而高視前古獨不在於今乎咸可賦
詩以光鴻烈

奉和聖製送赴集賢院賦得輝字

侍帝金華講千齡道固稀位將賢士設書共學徒歸首
命深燕隗通經淺漢韋列筵榮賜食送客愧儒衣賀燕
窺簷下遷鶯入殿飛欲知朝野慶文教日光輝

同前賦得迎字

源乾曜

盛業光書府徵人盡國英絲綸賢相稱羣俊學爲名寵
命垂天錫崇恩發睿情薰風清禁籞文殿述皇明日霽

庭陰出池新水氣生歡娛此無限詩酒自相迎

同前賦得昇字

裴 灌

問道圖書盛尊儒禮教興石渠因學廣金殿爲賢昇日
月恩光照龍雲寵命膺謨猷言可範舟楫事斯憑宴喜
明時洽光輝湛露凝大哉堯作主天下頌歌稱

同前賦得茲字

蘇 頲

肅肅金殿裏招賢固在茲鏘鏘石渠內岸序亦同時宴
錫歡談道文成貴說詩用儒今作相敦學舊爲師下濟
天光近中來帝渥滋國朝良史載能事日論思

同前賦得西字

韋 杭

廣庭臨璧沼多士侍金閨英宰文儒協明君日月齊集

賢光首拜改殿發新題
早夏初移律餘花尙拂溪壺觴
接雲上經術引關西聖德鴻名遠將陪玉檢泥

同前賦得迴字

程行謚

聖主崇文化鏘鏘得盛才
相因歸夢立殿以集賢開象
繫微言闡詩書至道該堯尊承帝澤禹膳自天來禮洽
歡逾長風恬暑更迴國朝將舜頌同是一康哉

同前賦得催字

李嵩

偃武堯風接崇文漢道恢集賢更內殿清選自中台
佐命留侯業詞華博物才天廚千品降夏日百壺催鵝鷺
方成列神仙喜暫陪復欣同拜首叨此頌良哉

同前賦得登字

蕭嵩

帝日簡才能旌賢在股肱文章體一變禮樂道逾弘芸
閣英華入賓門鵷鷺登恩延過所望聖澤日超恆夏葉
開紅蘂餘花發紫藤微臣亦何幸叨此預文朋

同前賦得私字

李元紘

碩儒延鳳詔金馬被鴻私饌玉還丹禁牋花降紫墀銜
恩傾旨酒鼓舞詠康時暫構羣書緝逾昭盛業丕接筵
欣有命擗管愧無詞自驚一何幸太陽還及葵

同前賦得暮字

賀知章

西學垂玄覽東堂發聖暮天光燭武殿時宰集鴻都枯
朽霑皇澤翮飛舞帝梧跡同遊汗漫榮是拔泥塗三歎
承湯鼎千歡接舜壺微軀不可答空欲詠依蒲

同前賦得今字

陸堅

聖主崇文教層霄降德音尊賢澤既厚式宴寵逾深復
有夔龍相良哉簡帝心得人惟邁昔多士詠推今書殿
榮光滿儒門喜氣臨顧惟成濫吹徒此接衣簪

同前賦得賓字

劉昇

圖書應明主策府宴嘉賓台曜臨東壁乾光自北辰網
羅窮象繫述作究天人聖酒千鍾洽仙廚百味陳成山
徒可仰涉海詎知津幸逢文教盛還覩頌聲新

同前賦得筵字

王翰

東堂起集賢貴得後神仙首命台階老將崇御府員送
人鏘玉佩中使拂瓊筵和樂薰風解湛恩時雨連長材

成磊落短翮強翩翩徒仰蓬萊地何階不讓緣

同前賦得蓮字

趙冬曦

術淺方觀海恩深忽見天學開丹殿籍名與石渠賢良
輔膺休命微生謬採甄春餘仍哢鳥夏近未開蓮牋札
來宸禁衣冠集詔筵史臣知醉德欲記升中年

同前賦得華字

韋述

修文中禁啟改字令名加台座徵人傑書坊應國華賦
詩開廣宴賜酒酌流霞雲散明金闕池開照玉沙掖垣
留宿烏溫樹落餘花謬此天光及銜恩醉日斜

左丞相說右丞相璟太子少傅乾曜同日上官

命宴東堂賜詩

御製

赤帝收三傑黃軒舉二臣由來丞相重分掌國之鈞我有握中璧雙飛席上珍子房推要道仲子訝風神復輟台衡老將爲調護人鵷鸞同拜日車騎擁行塵樂聚南宮宴觴連北斗醇俾子成百揆垂拱問彝倫

丞相少傅拜職天子作三傑之詩以命宴序

蘇 晉

惟聖寶賢以齊皇極有若左丞相燕國公右丞相廣平公太子少傅安陽侯皆生人碩德皇國元老道著廊廟績宣華戎由是懋其成功錫以元吉咨日于朔擇時于秋俾對命王庭受職公府見羣屬揖庶寮禮官辨章掌舍陳次工備侑饗獻蒸六卿拜下以成儀三事自天而

來賀秩秩賓序暉暉旅疇玉緯垂文南風和雅頌之變
金漿降醴雲天光飫酌之宜宰德貴和盡莊敬具瞻之
範羣情尙洽預周旋宴語之歡方將一心天工勦力帝
載寢黑山之柝包青海之戈雲雨賢才水火菽粟日詠
魚藻歲陳由庚頤殷趙之年留魯陽之景爰命在宴乃
賡載歌

奉和與璟乾曜同日上官命宴東堂賜詩應制
大塊鎔羣品輕生偶聖時猥承三仕命虛忝百僚師右
揆謀華碩前星傳重資連騫求舊禮濫點樂賢詩賜釜
同榮拜擬金宴宰司菊花吹御酒蘭葉捧天詞寶_麻休
明盛頽年晷漏衰少留青史筆未敢赤松期

同前

宋璟

丞相邦之重非賢諒不居老臣庸且億何德以當諸厚
秩先爲忝崇班復此除太常陳禮樂中掖降簪裾聖酒
山河潤仙文象緯舒冒恩懷寵祿陳力省空虛郭隗慙
無駿馮諛愧有魚不知周勃者榮幸定何如

同前

源乾曜

睿作超千古湛恩育萬人遞遷俱荷澤同拜忽爲鄰道
合音徽暢芳馳景命新鼓鍾崇享禮鵷鷺集朝倫竊位
思官謗雕容謝木春慙多無以敘拙備實難陳進級懷
三少承光盡百身自當歸第日何幸列宮臣

同前

蕭嵩

審官思共理多士屬惟唐
歷選台庭舊來熙帝業昌
入朝師百辟論道協三光
垂拱資元老親賢輔少陽
登崇榮禮送寵德耀宸章
卿酒飛觴洽仙闈雅樂張
荷恩思有報陳力愧無良
願罄忠公節同心奉我皇

同前

裴光庭

樂賢聞往誥衰德偶茲辰
端揆升元老師謀擇累仁
紫庭崇讓畢粉署禮容陳
既荷恩榮舊俱承寵命新
天文懸瑞色聖酒汎華茵
雜選陳簫鼓懽娛洽縉紳
掖垣招近侍虛薄廁清塵
其保堅貞節常期雨露均

同前

宇文融

申甫生周日宣慈舉舜年
何如偶昌運比德邁前賢
寵

護元良密榮瞻端揆遷職優三仕老位極百僚先北極
迴宸渥南宮飾宴筵飛文瑤札降賜酒玉杯傳謬列台
衡重俱承雨露偏誓將同竭力相與效塵涓

奉蕭中令酒并詩

樂奏天恩滿杯來秋興高更蒙蕭相國對酒飲醇醪

奉宇文黃門酒

聖德垂甘露天章下大風又承黃閣賞願作黑頭公

奉裴中書酒

西掖恩華降南宮命席闌詎知雞樹後更接鳳池歡

同二相以下羣官宴樂遊園

御製

撰日巖廊暇需雲宴樂初萬方朝玉帛千品會簪裾地

入南山近城分北斗餘池塘垂柳密原隰野花疏
看逾暗歌鍾聽自虛興闌歸騎轉還奏弼違書

奉和恩賜樂遊園宴應制

漢苑佳遊地軒庭近侍臣共持榮幸日來賞豔陽春饌
玉頰王篚攬金下帝鈞池臺草色徧宮觀柳條新花綬
光連榻朱顏暢飲醇聖朝多樂事天意每隨人

同前

宋璟

侍飲終醕會承恩續勝遊戴天惟慶幸選地卽殊尤北
向祇雙闕南臨賞一邱曲江新溜暖上苑雜花稠
韶絃屢戔戔賁帛周醉歸填畛陌榮耀接軒裘

同前

崔沔

五日酺初畢千年樂未央復承天所錫終宴國之陽地
勝春逾好恩深樂更張落花飛廣座垂柳拂行觴庶尹
陪三吏諸侯具萬方酒酣同抃躍歌舞詠時康

同前

張九齡

實筐延後命供帳序羣公形勝宜春接儀文建禮同晞
陽人似露解慍物從風朝慶千齡始年華二月中輝光
徧草木和氣發絲桐歲歲爲無事甯知樂九功

同前

胡皓

五酺終宴集三錫又歡娛僊阜崇高異神州眺覽殊南
山臨皓雪北闕對明珠宰座鷓鴻滿昌庭駟馬趨綺羅
含草樹絲竹吐郊衢銜杯不能罷歌舞恣唐虞

同前

王翰

未極人心暢何如帝道明仍嫌酺宴促復寵樂遊行陸
海披珍藏天河豈斗城四關清藹合數處白雲生餽餽
調元氣歌鍾溢雅聲空慙堯舜力至德杳難名

同前

崔尙

春日照長安皇恩寵庶官合錢承罷飲宴帛賜追歡供
帳憑高列城池入迴寬花催相國飲鳥和樂人彈北闕
雲中見南山樹杪看樂遊宜諦賞舞詠惜將闌

同前

趙冬曦

爽塏三秦地芳華二月初酺承奠璧罷宴是合錢餘柳
翠垂堪結桃紅卷欲舒從容會鵷鷺延曼戲龍魚喜氣

通雲物歡聲來里閭聖恩將厚意請述記言書

張說之文集卷第四

張四
文
集
卷
四

張四
文
集
卷
四

張說之文集卷第五

雜詩

東都酺宴五首

并序

詔宴永穆公主亭子

詔宴定昆池官莊

舟中和蕭令潭字

詔宴甯王山池

詔宴樂遊園

詔宴薛王山池序

詔宴甯王亭子

藥園宴武洛沙將軍

鳳樓尋勝地

皇帝降誕日集賢殿賜宴賜食於麗正書院宴

詔餞諸刺史

修書學士奉敕宴梁王宅

夕宴房主簿舍

并序

岳州宴姚紹之

并序

幽州夜飲

溫泉馮劉二監客舍觀妓

與劉評事文同宿

崔禮部園亭

城南亭作

對酒行

巴陵作

清夜酌

醉中作

東都酺宴五首

并序

先天元祀孟冬十月東都留守韋公寅奉聖朝述宣嘉
旨乃合洛京之五省招河伊之二縣將吏咸集佩章有
序鏘鏘濟濟侃侃闐闐供帳於興教之門式酺宴也原
夫樂生於心非因結風之奏和達於氣無待陽春之節
蓋澤之所及也深則情之所感者遠國家天地一統君
臣百年朝榮舊德之序野賴先疇之業化漸漬洪恩
既久太上功德不宰夏后命子之初皇帝孝理無為漢

祖事親之日生堯舜於天屬見文武於同時前古未逢
斯人何幸是日六樂振作萬舞苒弱鳥獸徘徊士女踊
躍則知眾庶觀聽之所樂也旨酒絡繹大庖燔炙芳溢
風煙醉流阡陌又知衣冠之所適也由近而視遠萬國
之慶皆然自明而察幽三靈之欣可接若夫吟詠德澤
播越人聲斯固雅頌之餘波政教之遺美凡我詞客安
敢闕如賦詩展事垂列于後

一

堯舜傳天下同心致太平吾君內舉聖遠合至公情錫
命承丕業崇親享大名二天資廣運兩曜益齊明道暢
昆蟲樂恩深朽蠹榮皇興久西幸留鎮在東京合宴千

宮入分曹百戲呈樂來嫌景遽酒著訝寒輕喜氣連雲
閣歡呼動洛城人間知幾代今日見河清

二

重華昇寶^麻軒帝眇閑居政成天子孝俗返上皇初忘
味因觀樂懽心寄合醑自憐疲馬意戀戀主恩餘

三

朱城塵暝滅翠幕景情開震震靈鼉起翔翔舞鳳來彫
盤裝草樹綺乘結樓臺共喜光華日酣歌捧玉杯

四

曉月調金鼓朝暾對玉盤爭馳羣鳥散鬪伎百花團遇
聖人知幸承恩物自懽洛橋將舉燭醉舞拂歸鞍

五

愷宴惟今席餘懽殊未窮入雲歌嫋嫋向日妓叢叢駛
管催酣興留闕待曲終長安若爲樂應與萬方同

晦日詔宴永穆公主亭子賦得流字

堂邑山林美朝恩晦日遊園亭含淑氣竹樹繞春流舞
席千花騎歌船五綵樓羣懽與王澤歲歲滿皇州

三月三日詔宴定昆池官莊賦得筵字

鳳凰樓下對天泉鸚鵡洲中帀管絃舊識平陽嘉麗地
今逢上巳盛明年舟將水動千尋日幕共林橫兩岸煙
不降玉人觀禊飲誰令醉舞拂賓筵

舟中和蕭令潭字

暮春三月日重三春水桃花滿禊潭廣樂逶迤天上下
仙舟搖衍鏡中酣

清明日詔宴甯王山池賦得飛字

今日清明宴佳境惜芳菲搖揚花雜下嬌轉鶯亂飛
渚傳歌榜虹橋度舞旂和風偏應律細雨不霑衣承恩
如改火春去春來歸

三月二十日詔宴樂遊園賦得風字

樂遊形勝地表裏望郊宮北闕連天頂南山對掌中皇
恩貸芳月旬宴美成功魚戲芙蓉水鶯啼楊柳風春花
看欲暮天澤戀無窮長袖招斜日留花待曲終

季春下旬詔宴薛王山池序

有生之性萬殊無方之感一節陽和而動植暢春滿而
皋壤悅后皇所以發時令布新慶二南邁周召之風百
辟形金石之詠者也碧流日暖南山雪殘首獻之浹辰
暮春之提月帝京形勝借上林而入遊戚里池臺就脩
竹而開宴泉罍御府味給天廚仙唱宥樂中貴督酒太
平佳事前史未書大矣哉一德日新九功惟敘運璿樞
而均四氣握金鏡而靜萬方堯舜湯文不違顏於咫尺
夔龍伊呂共接手於朝廷不克見而見焉不可聞而聞
者豈深思勝殘去殺累百年之至仁推麻按圖啟千齡
之昌運河清難得人代幾何擊壤之歡良有以也此則
青門上路朱邸平臺城煙屢起而泊山野風時來而過

水春將悵別愛落花之灑途夏如欣會玩峯雲之映沼
爾其列筵授几分曹設幕艇送江鳧船迎海鶴魚龍丸
劍曼延揮霍鸞鳳簫鼓朋鳴輩作申錫開於百甕慈心
出於三爵炮炙熏林塘醪醴馱邱壑抃急管於無算醉
湛恩以取樂羣公賦詩俾僕題序長卿消渴覺合毫之
轉遲子雲壯夫見彫蟲之都廢敢憚鄙詞之訥澀恐貽
盛集之蕪穢云爾

四月十三日詔宴^甯王亭子賦得好字

何許承恩宴山亭風日好綠嫩鳴鶴洲陰穠鬪雞道果
思夏來茂花嫌春去早行樂無限時皇情及芳草

藥園宴武洛沙將軍賦得洛字

東第乘餘興南園宴清洛文學引鄒枚歌鍾陳衛霍風
高大夫樹露下將軍藥待聞出塞還丹青上麟閣

鳳樓尋勝地

西掖持醇酒東山就白雲開軒綠池映命席紫蘭芬舞
度花爲伴鶯來管作羣太平多樂事春物共氛氲

皇帝降誕日集賢殿賜宴

仲秋金帝起五日土行昭瑞表壬寅露光傳甲子宵陰
風吹大澤夢日照昌朝不獨華封老千年喜祝堯

恩制賜食於麗正書院宴得林字

東壁圖書府西園翰墨林誦詩聞國政講易見天心位
竊和羹重恩叨醉酒深緩歌春興曲情竭爲知音

洛橋北亭詔餞諸刺史

離亭拂御溝，曲岸舞船樓。
詔餞朝廷收符分海縣，憂股肱還入郡。父母更臨州，扇逐仁風轉。
車隨霖雨流，恩光水上溢。榮色柳閒浮，預待羣方最。三公不遠求。

修書學士奉敕宴梁王宅賦得樹字

虎殿成鴻業，猿巖題鳳賦。旣荷大君恩，還蒙小山遇。
秋吹凝絃管，涼雲生竹樹。共惜朱邸歡，無辭洛城暮。

夕宴房主簿舍

并序

旅聽清管崇扃嚴，鑰巖雲暗山微。月白夜悄羣動之俱息，感孤鴻之遠音有美。房公霞海其量友，我以絲竹好我以尊俎。紆蘊結之雅懷，豁悠曠之陳意。滿堂旣醉同。

賦是詩

歲晏關雍空風急河渭冰薄遊羈物役微尙愜遠憑旅
館月宿永閉扃雲思興伊人美修夜明酒惠來稱交談
旣清雅琴吹亦淒疑不逢君蹇涸幽意長鬱蒸

岳州宴姚紹之

并序

姚司馬往在栢臺每欽骨鯁及茲荒服偶得官聯復有
令弟美^①芬芳襲予山寺外廬幽深形勝童冠是集歡
言賦詩

杞梓滯江濱光華向日新難兄金作友媚子玉爲人山
水含秋興池亭惜善鄰蒼松風送靜院竹鳥來馴翠葦
吹黃菊瑀盤膾紫鱗緩歌將醉舞爲拂繡衣塵

幽州夜飲

涼風吹夜雨，蕭瑟動寒林。
正有高堂宴，能忘遲暮心。
軍中宜劍舞，塞上重笳音。
不作邊城將，誰知恩遇深。

溫泉馮劉二監客舍觀妓

溫泉寒林暮，王遊樂事多。
佳人躑躅駿馬乘，月夜相過秀色燃。
紅黛嬌香發，綺羅鏡前鸞。
對舞琴裏鳳，傳歌妒寵傾。
新意銜恩奈，老何爲君留。
上客歡笑斂，雙蛾

行從方秀川與劉評事文同宿

方秀美盤遊，頻年降天罕。
水共伊川接，山將闕門斷。
捧日照恩華，攀雲引疲散。
野宿霜入帳，孤衾寒不暖。
靜聞宮漏疏，卧視庭月滿。
開鑪命溫酎，中夜發清管。
風送關

山長氣適星歲短寓言情義愜適興真意坦環中病羈
掛方外嫌縱誕願君樂盛時無嗟帶纒緩

崔禮部園亭得涼字

窈窕留清館虛徐步晚陰水連伊闕近樹接夏陽深柳
蔓憐垂拂藤苗愛上尋訝君軒蓋侶非復俗人心

城南亭作

珂馬朝歸連萬石稍門洞啟親迎客北堂珍重琥珀酒
庭前列肆茱萸席長袖遲迴意緒多清商緩轉日騰波
舊傳比翼侯家舞新出將雛主第歌漢家絳灌餘兵氣
晉代浮虛安足貴正逢天下金鏡清偏加日飲醇醪意
誰復遨遊不復歸閒庭莫畏不芳菲會待城南春色至

競將花柳拂羅衣

對酒行 巴陵作

留侯封萬戶園令壽千金本爲成王業初由賦上林繁
榮安足恃霜露遞相尋鳥哭楚山外猿啼湘水陰夢中
城闕近天畔海雲深空對忘憂酒離憂不去心

清夜酌

秋陰士多感雨息夜無塵清尊宜明月復有平生人

醉中作

醉後無窮樂彌勝未醉時動容皆是舞出語總成詩

張說之文集卷第六

雜詩

送趙二尚書北伐

送郭大夫元振再使吐蕃

送鄭惟忠從公主入蕃

送李侍郎迴秀薛長史季昶

送趙頤貞郎中赴安西

送崔長史日知赴潞州

送兗公赴荊州

送高唐州

送蘇合宮題

送王峻自羽林赴永昌令

同王僕射餞岑廣武義

送喬安邑備

送任御史江南發糧

送王尙一嚴巖二侍御

送李問政河北簡兵

送薛植入京

送宋休遠之蜀任

送梁知微渡海東

別平一師

送武員外郎

送尹補闕元凱琴歌

送王光庭

新都南亭

別許鄭二判官

岳州宴別潭州王熊

首二奉答張岳州二首

王熊

和別二首

韋嗣立

岳州別王十一趙公入朝

奉別燕公

王琚

岳州別梁六入朝

奉別燕公

梁知微

送梁六自洞庭山作

廣州蕭都督入朝

岳州別姚司馬紹之

送李十從軍歸桂州

岳州別均

送敬丞

見諸人送杜丞詩因以成作

幽州別陰長河

幽州送隨軍入秦

幽州送尹忭成婦

嶺南送使三首

南中別王陵戍崇

石門別楊六卿望

端州別高六戩

南中別蔣五向青州

南中別陳七李十

南中送北使二首

送趙二尙書彥昭北伐

虜地河冰合邊城備此時兵連紫關路將舉白雲司題
劍榮中賞銜珠盛出師日華光組練風色燄旌旗投筆
尊前起橫戈馬上辭梅花吹別引楊柳賦新詩

送郭大夫元振再使吐蕃

犬戎廢東獻漢使馳西極長策問酋渠猜阻自夷殛容
髮徂邊歲旌裘弊海色五年一見家妻子不相識武庫

兵猶動金方事未息遠圖候才智苦節輸筋力脫刀贈
分手書帶加餐食知君萬里侯立功在異域

送鄭大夫惟忠從公主入蕃還字韻

鳳吹遙將斷龍旗送欲還傾都邀節度傳酌緩離顏春
磧沙連海秋城月對關和戎應賞魏定遠莫辭班

送李侍郎迴秀薛長史季昶同賦得水字

漢郡接胡庭幽并對烽壘旌旗按部曲文武惟卿士薛
公善籌畫李相威邊鄙中冀分兩河長城各萬里藉馬
黃花塞蒐兵白狼水勝敵在安人爲君汗青史

送趙頤貞郎中赴安西

絕鎮功難立懸車命匪輕復承遷相後珍重任賢情將

起神仙地才稱禮樂英長心堪擊虜短語足論兵日授
休明法星教置陣名龍泉恩已署燕頷相終成月窟窮
天遠河源入塞清老夫操別翰承旨頌營平

送崔二長史日知赴潞州

東山懷卧理南省悵悲翁共見前途促何知後會同莫
輕一筵宴明日半成空況爾離庭闕思歸迷夢中

同賀八送兗公赴荊州

疇昔同聲友騫飛出鳳池風雲一蕩薄日月屢參差此
別黃葉下前期安可知惟憐楚南樹不爲歲寒移

送高唐州

常時好閑獨朋舊少相過及爾宣風去方嗟別日多淮

流春婉婉汝海路蹉跎百歲屢分散懼言復幾何

送蘇合宮頌

都邑羣方首商泉萬俗訛變風須愷悌成化仁絃歌疇
昔珪璋友雍容文雅多振纓遊省闈鏘玉宰京河別曲
鸞初下行軒雉尙過百壺非餞意流詠在人和

送王峻自羽林赴永昌令

將星移北洛神雨避東京爲負剛腸譽還追強項名白
雲向伊闕黃葉散昆明多謝絃歌宰稀聞桴鼓聲

同王僕射山亭餞岑廣武羲得言字

聞道長岑令奮翼宰旅門長安東陌上送客滿朱軒琴
爵留佳境山池借好園茲遊恨不見別後綴離言

送喬安邑備

書閣移年歲文明難復辭歡言冬雪滿恨別夏雲滋外
尹方爲政高明自不欺老人驂馭往童子狎羣嬉日茂
西河俗寂寥東觀期遙懷秀才令京洛見新詩

送任御史江南發糧以振河北百姓

河朔人無歲荆南義廩開將興汎舟役必仁濟川才花
月臨江浦春雲厯楚臺調饑坐相望繡服幾時迴

送王尙一嚴疑二侍御赴司馬都督軍

漢掖通沙塞邊兵護草腓將行司馬令助以鐵冠威白
露鷹初下黃塵騎欲飛明年春酒熟留酌二星歸

送李問政河北簡兵

斗酒貽朋愛，踟躕出御溝。依然四牡別，更想八龍遊。密
親仕燕薊，連年邇寇讎。因君闕河朔，垂淚語幽州。

送薛植入京

青組言從史，鴻都忽見求。款言人向老，飲別歲方秋。髟
鬣長安陌，平生是舊遊。何時復相遇，宛在水中流。

送宋休遠之蜀任

求友殊損益，行道異窮申。我綴平生氣，吐贈薄遊人。結
恩事明主，忍愛遠辭親。色麗成都俗，膏腴蜀水濱。如何
從宦子，堅白共淄磷。日月千齡旦，河山萬族春。懷鉛書
瑞府，橫草事邊塵。不及安人吏，能令王化_①瑄。

送梁知微渡海東

今日此相送明年此相待天上客星迴知君渡東海

別平一師

王子不事俗高駕眇難追茅土非屑眄傾城無樂資
宴坐深林中三世同一時皎皎獨往心不爲塵網欺
竭來已復去今去何來思迴首謝同行動會安清期

送武員外郎中春赴秀師嵩山塔下舍利

懷玉泉戀仁者寂滅真心不可見空留影塔巖嵩下寶
玉四海轉千輪金墀百粒送分身山中二月娑羅會虛
唄遙遙愁思人我念過去微塵劫與子禪門同正法雖
在神仙蘭省間常持清淨蓮花葉來亦好去亦好了觀
車行馬不移當見菩提離煩惱

送尹補闕元凱琴歌

公善琴

鳳哉鳳哉啄琅玕飲瑤池栖崑崙之山哉中國有聖人
感和氣飛來自歌自舞先王冊府麒麟之臺羈雌眾雛
故山曲其鳴喈喈其鳴喈喈欲往銜之欸去來去別鸞
鳳心徘徊明年阿閣梧桐花葉開羣飛鳳歸來羣飛鳳
歸來

送王光庭

同居洛陽陌經日嬾相求及爾江湖去言別悵悠悠楚
雲眇羈翼海月倦行舟愛而不可見徒嗟芳歲流

新都南亭送郭元振盧崇道

竹徑女蘿溪蓮洲文石隄靜深人俗斷尋玩往還迷碧

潭秀初月素林驚夕栖
褰幌納蟾影理琴聽猿啼
佳辰改宿昔勝寄坐睽攜
長懷賞心愛如玉復如珪

相州前池別許鄭二判官景先神力

數步圓塘水雙鴻戢羽儀
一飛喬木上一返故林垂澹
泊含秋景虛明抱夜規無
因留絕翰雲海意差池

岳州宴別潭州王熊二首

絲管清且哀一曲傾一盃
氣將然諾重心向友朋開
古木無生意寒雲若死灰
贈君芳杜草爲植建章臺
縉雲連省閣溝水遽西東
然諾心猶在容華歲不同
孤城臨楚塞遠樹入秦宮
誰念三千里江潭一老翁

奉答張岳州二首

王熊

長沙辭舊國洞庭逢故人薰蘭敦久要披霧轉相親
歲月方嗟老江山不惜春忽聞黃鶴曲更作白頭新
平生共風月倏忽閒山川不期交淡水暫得款忘年興
逸方罷釣帆開欲解船離心若危旆朝夕爲君懸

余昔忝省閣與岳州張使君潭州王都督同官
聯事後承朝譴各自東西張公與王都督別詩
二首情頗殷勤余覽以耿歎因遙申和云

韋嗣立

茂先王佐才作牧楚江隈登樓正欲賦復遇仲宣來黃
鵠飛將遠雕龍文爲開甯知昔聯事聽曲有餘哀

昔時陪二賢纓冕會神仙一去馳江海相逢共播遷無

因千里駕忽覩四愁篇覽諷歡何已歡從徒愴然

岳州別王十一趙公入朝

昔濫貂蟬長同承雨露霏今參魚鼈守望美洞庭歸浦
樹懸秋影江雲燒落暉魂離似征旆恆往帝鄉飛

奉別燕公

王士琚

五載朝天子三湘逢舊寮扁舟方輟棹清論遂終朝遠
樹煙間沒長江地際遙帝城馳夢想歸旆滿風颺

岳州別梁六入朝

遠泄長沙渚欣逢賈誼才江山疲應接風日復晴開江
樹雲間斷湘山水上來近洲朝鷺集古戍夜猿哀岸柳
含蒼靄河蒲秀紫臺月餘偏地賞心盡故人盃自我違

京洛嗟君此沂澗容華因別老交舊與年頽夢見長安
陌朝宗日盛哉

奉別燕公

梁知微

華容佳山水之子馱承明符竹迂小郡江湖被德聲三
年計吏入路指巴邱城鳧舟纔結纜騶駕已相迎別離
他鄉酒委曲故人情孤嶼早煙泊長波晚氣清辛勤方
遠驚勝賞屢難并迴瞻洞庭浦日暮愁雲生

送梁六自洞庭山作

巴陵一望洞庭秋日見孤峰水上浮聞道神仙不可接
心隨湖水共悠悠

廣州蕭都督入朝過岳州宴餞得冬字

孤城抱大江節使往朝宗果是臺中舊依然水上逢京
華遙比日疲老颯如冬竊羨能言鳥銜恩向九重

岳州別姚司馬紹之制許歸侍

和玉悲無已長沙宦不成天從扇枕願人逐倚門情方
外懷司馬江東憶步兵向君棲泊處空嶺夜猿鳴

岳州送李十從軍歸桂州

送客江之上其人美且偲風波萬里闊歡舊十年來劍
拔蛟知斷弓鳴虎自開楊橋書未落駟馬定先迴

岳州別均

離筵非讌喜別酒正銷魂念爾猶童孺嗟余隔遠藩津
亭拔心草江路斷腸猿他日將何見愁來獨倚門

送敬丞

嘉會良難永芳樽此夜閑別離三春暮親愛兩鄉間落花已覆水巖雲欲起山庭蘭行可佩采采贈河關

見諸人送杜丞詩因以成作

吳楚分江鎮華容改舊城訝君來遠謁知有去思情風度沅湘險煙還雲夢平寄言洞庭郡何德子爲名

幽州別陰長河

惠好交情重辛勤世事多荆南久爲別薊北遠來過寄目雲中鳥留歡酒上歌影移聲復間遲暮兩如何

幽州送隨軍入秦

楊子來戎幕老夫欣主諾歸路有光華邊庭少咨度雁

知窮朔苦人羨長安樂獨將馬革心同聲謝臺閣

幽州送尹忭成婦

婚禮知無賀承家歎有輝親迎驥子躍吉兆鳳雛飛溫
席開華扇梁門換褰衣遙思桃李日應賦采蘋歸

嶺南送使三首

秋雁逢春返流人何日歸將子去國淚灑子入鄉衣饑
狄啼相聚愁猿喘更飛南中不可問書此示京畿
獄中生白髮嶺外罷紅顏古來相送處凡得幾人還
萬里投荒裔來時不見親一朝成白首看取報家人

南中別王陵戍崇

握手與君別岐路贈一言曹卿禮公子楚媪饋王孫倏

爾生六翮翻飛戾九門常懷客鳥意會答主人恩

石門別楊六卿望

燕人同竄越萬里自相哀影響無期會江山此地來暮
年傷汎梗累日慰寒灰潮水東南落浮雲西北迴但看
石門遠倚棹兩悲哉

端州別高六叢

異壤同羈竄途中喜共過愁來時舉酒勞罷或長歌南
海風潮壯西江瘴癘多於焉復分手此別傷如何

南中別蔣五向青州

老親依北海賤子棄南荒有淚皆成血無聲不斷腸此
中逢故友彼地迂還鄉願作江楓葉隨君度洛陽

南中別陳七李十

二年共遊處一旦各西東請君聊駐馬看我轉征蓬畫
鷁愁南海離駒思北風何時似春雁雙入上林中

南中送北使二首

傳聞合浦葉曾向洛陽飛何日南風至還隨北使歸紅
顏度嶺歇白首對秋衰高歌何日見層堂不可違誰憐
炎海曲淚盡血霑衣

待罪居重譯窮愁暮雨秋山臨鬼門路城繞瘴江流人
事今如此生涯自可求逢君入鄉縣傳我念京周別後
歸途遠離言暮景遒夷歌翻下淚蘆酒未消愁聞有胡
兵急深懷漢國羞和親先是詐款塞果爲仇釋繫應分

爵蠲徒幾復侯廉頗誠未老孫叔且無謀若道馮唐事
皇恩尙可收

張說之文集卷第六

張說之文集卷第七

雜詩

贈崔公

留贈張御史張判官

贈高六戩

贈廣平公宋大

贈趙公

奉答燕公二首 王琚

贈趙侍御

伯奴邊見歸田賦

奉酬見歸田 趙冬曦

翻著葛巾呈趙尹 岳州作

同前 趙冬曦

偶遊龍門北溪 韋嗣立

奉酬龍門北溪作

同前 崔泰之 魏奉古 崔日知

經龍門北溪 韋嗣立

酬韋祭酒經龍門北溪

冬日述懷 崔日知

酬崔光祿冬日述懷 并序

同前 韋嗣立

同光祿弟冬日述懷 崔泰之

桐竹 李伯魚

答李伯魚桐竹

和魏僕射還鄉

和張監觀赦

和張監遊終南

和朱使

和朱使二首

同趙侍御巴陵早春作

乾湖作 并序 趙冬曦

同趙侍御乾湖作

同趙侍御望歸舟

遙同蔡起居偃松篇

同劉給事城南宴集

出湖寄趙冬曦二首

寄姚司馬

寄許八

代書答姜七崔九

代書寄吉十一

代書寄薛四

寄天台司馬道士

寄劉道士烏

書香能和尙塔

贈崔公

我聞西漢日四老南山幽長歌紫芝秀高卧白雲浮朝
野光塵絕榛蕪年貌秋一朝驅駟馬連袂入龍樓昔遁
高皇去今從太子遊行藏唯聖節福禍在人謀卒能匡
惠帝豈不賴留侯事隨年代遠名與圖籍留平生欽厚
德慷慨景前修蟋蛤伺陰兔蛟龍望斗牛無嗟異飛伏
同氣幸相求

留贈張御史張判官

旅竄南方遠傳聞北使來舊庭知玉樹合浦識珠胎白
髮因愁改丹誠說夢迴皇恩若再造爲憶不然灰

贈高六叟

北極辭明代南溟宅放臣丹誠由義盡白髮帶愁新烏
墮炎洲氣花飛洛水春平生歌舞席誰憶不歸人

贈廣平公宋大

亞相本時英歸來復國楨朝推長孺直野慕隱之清傳
節還閩嶂皇恩入漢京甯思江上老歲晏蹇無成

贈趙公

湘東股肱守心與帝鄉期舟楫中路蹇風波復來思嘉
我常聯翼金貂侍玉墀跡參前馬聖名綴鬻熊師寒暑
一何速山川遠間之甯知洞庭上獨得平生時精義微
絕簡從權討妙碁林壑爲子請紛靄發華滋流賞忽已

散驚帆杳難追送君在南浦佗倅投此詞

奉答燕公

二首

王琚

誰道零陵守東過此地遊友寮同省閣昆弟接荊州我
逐江潭雁君隨海上鷗屢傷神氣沮久別鬢毛秋疑嶺
春應徧陽臺雨欲收主人情未盡高駕少淹留
語別意悽悽零陵湘水西佳人金谷返愛子洞庭迷舊
館逢花發他山值鳥啼江天千里望唯見綠蘋齊

贈趙侍御

祿放跡異端偏荒事同蹇苟忘風波累俱會雲壑踐險
式壓西湖僑廬對南峴夜樓江月入朝幌山雲卷山勢
遠濤連江途斜漢轉坐嘯予多暇行吟子獨善並轡躡

郊郭方舟玩遊演虛聲萬籟分水色千里辨不知岸陰
謝再見春露泫綠壤發欣顏華年助蟲篆上世時難接
古人情可選汨渚煩爲媒多才怨成福長沙鵬作賦任
道可知淺請從三已心榮辱兩都遣

伯奴邊見歸田賦因投趙侍御

爾家歎窮鳥吾族賦歸田莫道榮枯異同嗟世網牽黃
陵浮汨渚青草會湘川去國逾三歲茲山老二年寒鴉
鳴舍下昏虎卧籬前客淚堪斑竹離憂欲贈荃放言久
無次觸興感成篇

奉酬見歸田賦垂贈之作

趙冬曦

窮鳥嬰籠綴孤飛任播遷鷦鷯王佐用復此挫冲天楚

雲何掩鬱湘水亦迴遭懷哉愧木雁忽爾枉蘭荃愈疾
同枚叔銷憂比仲宣歸途書可畏弱操石尤堅覆載雖
云廣潞陽直塊然

翻著葛巾呈趙尹

岳州作

昔日接羅倒今我葛巾翻宿酒何時醒形骸不復存忽
聞有嘉客躡步出閑門桃花春徑滿誤識武陵源

同前

趙冬曦

美酒值芳春醒餘氣益眞降歡時倒屣乘興偶翻巾徐
榻思方建莊車理自均傲然歌一曲一醉濯纓人

偶遊龍門北溪忽懷驪山別業呈諸留守

韋嗣立

幽谷杜陵邊風煙別幾年偶來伊水曲溪嶂覺依然傍
浦憐芳樹尋崖愛淥泉嶺雲隨馬足山鳥向人前地合
心俱靜言因理自（玄）短才叨重寄尸祿愧妨賢每揖挂
冠侶思從初服旋稻梁仍欲報歲月坐空捐助岳無纖
芥輸溟謝末涓還晤北轅矢方茲南澗田

奉酬龍門北溪作

石澗泉虛落松崖路屈迴聞君北溪下想像南山隈近
念鼎門別遙思雲嶂陪不同奇覲往空覩斯文來歲後
寒初變春前芳未開黃蕤裹岸柳紫萼折春梅盡室茲
遊翫盈門幾樂哉嗟遊洛陽陌夢詣建章臺野失巢由
性朝非元凱才布懷欽遠近幽意日塵埃

同前

崔泰之

關塞臨伊水，驪山枕瀚川。俱臨隱路側，同在帝城邊。
謝公兼出處，攜妓玩林泉。鳴鶻噴梅雪，飛蓋曳松煙。
聞琴幽谷裏，看博古巖前。落月低幃帳，歸雲繞管絃。
叨榮慙北闕，微尙愛東田。寂寞灰心盡，蕭條塵事捐。
朝思登絕壑，夜夢弄潺湲。宿懷南澗意，況覩北巖篇。

同前

崔日知

夙齡秉微尙，中年忽有鄰。以茲山水癖，遂得狎通人。
迨我南京道，聞君北業新。巖前窺石鏡，河畔蹋芳茵。
旣憐伊浦淥，復憶灞池春。連詞謝家子，同歡冀野賓。
趣閑魚共樂，情洽鳥來馴。誰念昔遊者，祇命獨留秦。
蕭條潁陽

戀沖漠漢陰真無由陪勝躅空此玩書筠

同前

魏奉古

有美朝爲貴幽尋地自偏踐臨伊水泐想望灞池邊是
遇皆新賞茲遊若舊年藤蘿隱路接楊柳御溝聯道愜
神情主機忘俗理捐遂初誠已重兼濟實爲賢跡是東
山戀心唯北闕前顧慙經拾紫多謝賦思玄未躡中林
步空乘華藻傳陽春和色寡扣寂竟徒然

僕自湯還都經龍門北溪莊宿張左丞崔禮部

崔光祿並枉垂光顧數公宿敦道義雅尙林壑
謂急於幽尋故此命駕遂不知別有勝賞偶然
相過寒暄未周神意已往雲霞之致蔑而不存

逸轡放驅清塵徒企耿歎不已而贈是詩

韋嗣立

棲閑有愚谷好事枉前軒樹接前驅擁巖傳後騎喧褰
簾出野院植杖候柴門旣拂林下席仍攜池上樽深期
契幽賞實謂展歡言未眷誠未易佳時遊更敦俄看嘯
儔侶各已共飛騫遠睇盡朝日長懷通夜魂空聞岸竹
動徒見浦花繁多愧春鶯曲相承意獨存

酬韋祭酒自湯還都經龍門北溪見贈

聞君湯井至瀟灑憩郊林拂曙攜清賞披雲覲綠岑歡
言遊覽意款曲望歸心是日期嘉客同山忽異尋桃源
花路轉楊柳間門深汎舟伊水漲繫馬香樹陰繁絃弄

水族嬌吹狎沙禽春滿汀色媚景斜嵐氣寥懷仁殊未
遠重德匪輕臨來藻敷幽思連詞報所欽

冬日述懷奉呈韋祭酒張左丞蘭臺名賢

崔日知

弱齡好經籍披卷卽怡然覃精四十載馳騁數千言孔
壁采遺篆周韋考絕編袁公論劍術孫子敘兵篇魯史
君臣道姬書日月懸從師改炎燠負笈徧山川上異西
河夏中非北海玄光榮拾青紫名價接通賢旣重萬鍾
樂甯思三頃田長戟同分虎高冠亞附蟬晚懷重虛曠
養志息雕鐫登高慙思拙匠物謝精妍不慕張平子甯
希王仲宣誰爲登龍日翻成刻鶴年循循勞善誘軋軋

思微牽琢磨才既竭鑽仰德彌堅朽木誠爲諭捫心徒
自憐終期吞鳥夢振翼上雲煙賦成先擲地詞高直挾
天更執摳衣禮仍開函杖筵露披槐市藹水靜璧池圓
願逐從風葉飛舞翰林前

酬崔光祿冬日述懷贈答

并序

太極殿眾君子分司洛城自春涉秋日有遊討旣而韋
公中守茲樂便廢頃因公醺方接詠言崔光祿述志論
文首貽雅唱諸公嘉德敘事咸有報章若夫盛時榮位
華景勝會此四者古難一遇而我輩比實兼之至於精
言探道妙識發義戲謔而逢規誠指諷而見師表益過
三友豈易得乎謂膏澤傍潤芝蘭久襲韋公近之矣以

琴
文會友以友輔仁崔公近之矣其餘尋聲響答望形影
赴故亦峻碧池之漣漪增瑤林之沃若是用綴集勒成
一卷永存几閣之玩無忘歡好之時焉

徐陳嘗並作枚馬亦同時各負當朝譽俱承明主私夫
君邁前侶觀國騁奇姿山似鳴威鳳泉如出寶龜才雄
子雲筆學廣仲舒帷紫綬拂三寺朱門臨九達昔我含
香日連爾縉雲司朝攜蘭省步夕退竹林期中路一分
手數載來何遲求友還相得羣英復在茲留臺少人務
方駕遞尋追涉玩懷同賞霑芳憶共持迎賓南澗飲載
妓東郊嬉春郊綠畝秀秋澗白雲滋名畫披人物良書
討滯疑興來光不惜歡往迹如遺歲晏罷行樂層城間

所思夜魂燈處馱朝髮鏡前衰忽枉崔駟什兼流韋孟
詞曲高彌寡和主善代爲師齊戒觀華玉留連歎色絲
終慙起予者何足與言詩

酬崔光祿冬日述懷

并序

韋嗣立

光祿崔卿公曠懷通識濟時良具負材器晚耽圖籍愛
林泉不遺琴詠門多長者善與人交僕參臺閣早經聯
事雖幸揖風彩而不接殷勤崔公以雅道自居未嘗至
偃之室及僕積抱羸疾屢祈牧退朝廷恩假職以優閑
多取急歸林服餌爲事門堪羅雀庭見狎鷗崔公則多
存訪不避風雨方知向時跡也今晨情也蘭菊春秋自
芳竹柏歲寒無變僕敬之重之故不能忘也嘗談及詞

翰頗申揜忽枉贈章因以投報云爾

亭伯負高名羽儀稱上京魏珠能燭乘秦璧許連城六月飛將遠三冬學已精洛陽推賈誼江夏貴黃瓊推演中都術旋參河尹聲累遷登御府移拜踐名卿庭聚歌鐘麗門羅檠戟榮鸚盃飛廣席獸火列前楹散誕林園意殷勤敬愛情無容抱衰疾良宴每招迎契得心逾重言忘道益真相勛忠義節共談詞賦英雕蟲曾廢棄白鳳已先鳴光接神愈駭音來味不成短歌甘自惡鴻藻彌難清東里方希潤西河敢竊明厚誣空見迫喪德豈無誠端守宮闈地寒煙朝暮平顧才無術淺懷器識憂盈月下對雲闕風前聞夜更昌年雖共偶歡會此難并

爲憐漳浦曲沈痼有劉禎

同光祿弟冬日述懷韋祭酒張左丞二公並廊
廟偉才朝廷舊相咸先首和殊爲佳作輒繼陽

春深增媿悚

崔泰之

吾族白眉良才華動洛陽觀光初入仕應宿始爲郎飛
螢玩書籍白鳳吐文章海卿逾往雅河尹冠前張擇才
綏鄢郢殊化被江湘高樓臨廣陌甲第敞通莊別館邛
山下疏亭洛水旁昌年豐賞陌暇日悅林塘衣冠皆秀
彥羅綺盡名倡隔岸聞歌度臨池見舞行門庭寒變色
榮戟自生光窮陰方黷黷殺氣正蒼茫感時興盛作晚
歲共多傷積德韋丞相通神張子房束草編簪紱逸韻

張
合宮商功名留守省濫跡在文昌家園遙可見臺寺近
相望無庸乘侍謁有暇共翱翔棣華依雁序竹葉拂鸞
觴水坐憐秋月山行弄晚芳恩榮暫服冕友愛勸垂堂
無由報天德相顧詠時康

桐竹

李伯魚

北竹青桐北南家綠竹南竹林君早愛桐樹我初貪鳳
棲桐不愧鳳食竹何慚棲食更如此餘非鳳所堪

答李伯魚桐竹

結廬桐竹下室邇人相深接垣分竹徑隔戶共桐陰落
花朝滿岸明月夜披林竹有龍吟管桐留鳳舞琴奇聲
與高節非君誰賞心

和魏僕射還鄉

富貴還鄉國光輝滿舊林
秋風樹不靜君子歎何深
故老空懸劍鄰交日散金
眾芳搖落盡獨有歲寒心

和張監觀赦

日御臨雙闕天街儼百神
雷舒作解氣歲復建寅春
喜候開星驛歡聲發市人
金環能作賦來入管絃新

和張監遊終南

宿懷終南意及此語雲峯
夜聞竹澗靜曉望林嶺重
春煙生古石時鳥戲幽松
豈無山中賞但畏心莫從

和朱使欣道峽似巫山之作

江如曉天淨石似暮雲張
征帆一流覽宛若巫山陽
楚

客思歸路秦人謫異鄉猿鳴孤月夜再使淚沾裳

和朱使二首

南土多遺寇西江盡畏途山行阻篁竹水宿礙萑蒲使
越才應有征蠻力豈無空傳人贈劍不見虎銜珠
江勢連山遠天涯此夜愁霜空極天靜寒月帶江流思
起南征棹文高北望樓自憐如墜葉汎汎侶仙舟

同趙侍御巴陵早春作

江上春來早可觀巧將春物妒餘寒水苔共繞留烏石
花鳥爭開鬪鴨欄佩勝芳辰日漸暖燃燈美夜月初圓
意隨北雁雲飛去不待南州蕙草殘

乾湖作并序

趙冬曦

巴江南澗湖者蓋沅湘澧汨之餘波焉茲水也淪匯洞庭澹澹千里夏潦奔注則沃爲此湖冬霜旣零則涸爲平野按爾雅云水返入爲澗斯名之作有由焉爾而此鄉炎暑子月草生彌望青青相與遊藉豈盈虛之可歎亦風景之多傷感物增懷因書其事

三湖返入兩山間畜作澗湖灣復灣暑雨奔流潭正滿
微霜及潦水初還水還波卷溪潭涸綠草芊芊岸嶄峩
適來揮棹共洞旋已復揚鞭恣行樂道旁耆老步蹢躅
楚言茲事不知年試就湖邊披草徑莫疑東海變桑田
君訝今時盡陵陸我看明歲更淪漣來今自昔無終始
人事迴環恆若是應思闕下聲華日誰謂江潭旅遊子

初真正喜固賞然往蹇來譽宜可俟盈虛用舍輪與旋
勿學靈均遠問天

同趙侍御乾湖作

江南湖水咽山川春江溢入共湖連氣色紛淪橫罩海
波濤鼓怒上漫天鱗宗殼族嬉爲府弋叟隸師利聚焉
敲帆側柁弄風口赴險淩深繞灣浦一灣一浦悵邐迴
千曲千澹恍迷哉乍見靈妃含笑往復聞遊女怨歌來
暑往寒來運洄洑潭深水落移陵谷雲間墜翮散泥沙
波上浮查棲樹木昨暮飛霜下北津今朝行雁度南濱
處處溝港清源竭年年舊葦白頭新天地盈虛尙難保
人間倚伏何須道秋月晶晶汎澄瀾冬景青青步纖草

念君宿昔觀物變安得踟躕不衰老

同趙侍御望歸舟

山亭迴迴面長川江樹重重極遠煙形影相追高翥鳥
心腸併斷北飛船

遙同蔡起居偃松篇

清都眾木總榮紛傳道孤松最出羣名接天庭長光景
氣連宮闕借氛氲懸池滴滴停華露偃蓋重重拂瑞雲
不惜流膏助仙鼎願將楨榦捧明君莫比冥靈楚南樹
朽老江邊代不聞

同劉給事城南宴集

水竹幽閑地簪纓近侍臣雍容乘暇日瀟灑出囂塵樹

長栖朋鳥池深入養鱗管絃高逐吹歌舞妙含春老子
叨專席懽遊隔縉紳此中情不淺遙寄賞心人

出湖寄趙冬曦二首

西汎平湖盡參差入斷山東瞻岳陽郡汗漫太虛間窟
步同行樂適文互屢看山戍上雲桂江亭臨水閒
川途倏忽間風景依如昨湘浦未賜環荆門猶主諾何
時與美人載酒遊宛洛

寄姚司馬

其君春種瓜本期清夏暑瓜成人已去失望將誰語裊
露摘香園感味懷心許偶從西風便因之寄鄂渚

寄許八

萬類春皆樂，徂顏獨不怡。年來人更老，花發意先衰。乳
雀穿壇畫，巢蜂觸網絲。平生美容色，宿昔影中疑。遠道
何由夢，同心在者誰。西風欲寄語，憫默遂無詞。

代書答姜七崔九

婀娜金闕樹，離披野田草。雖殊兩地榮，幸共三春好。花
殊鳥飛處，葉縷蟲行道。真心獨感人，惆悵令人老。

代書寄吉十一

一雁雪上飛，值我衡陽道。口銜離別字，遠寄當歸草。目
想春來遲，心驚寒去早。憶鄉乘羽翮，慕侶盈懷抱。零淚
答故人，將隨江樹老。

代書寄薛四

孤雁東飛來寄我紋與素紋足經三象素當綜羣務遠
見古人心一言重千金答之綵毛翰繼以瑤華音歲寒
眾木改松柏心當在

寄天台司馬道士

世上求真客天台去不還傳聞有仙夢寐在茲山朱
闕青霞斷瑤臺紫月閑何時枉飛鶴笙吹接人間

寄劉道士鳥

真人降紫氣邀我丹田宮遠寄雙飛鳥鳥飛不礙空

書香能和尙塔

大師捐世去空餘法力在遠寄無礙香心隨到南海

張說之文集卷第七

張說之文集卷第八

律詩

被使在蜀

正朝摘梅

蜀道後期

過蜀道山

再使蜀道

深渡驛

古泉驛

下江南向夔州

江路憶郡

廣州江中作

江中誦經

江中遇黃領子劉隆

卻歸在道中作

還至端州驛

喜渡嶺

過漢南城歎古墳

至尉氏

景空寺題融上人蘭若

四月一日過江赴荊州 襄陽路逢寒食

巡邊在河北作二首 入海二首

清遠江峽山寺 相州冬日早衙

相州北亭 相州山池作

岳州作二首 岳州行郡竹籬

陪燕公行郡竹籬 趙冬曦 荊州亭入朝

岳州西城 岳州山城

奉和山城 岳州晚景

遊洞庭湖二首 秋夜遊澠湖二首 尹忭

和尹從事二首 同前 趙冬曦 張均

遊澠湖上寺 同前 王琚 趙冬曦

汎洞庭 尹忭

和尹從事

澧湖山寺二首

早霽南樓

奉和早霽南樓 趙冬曦

奉陪登南樓 尹忭

同前

同前 趙冬曦

同前

別澧湖

奉和別澧湖 趙冬曦

巴邱春作

石門墨山禪堂觀

遊龍山靜勝寺

一柱觀

登九里臺

懷王墓

庾信宅

被使在蜀

即今三伏盡尙自客臨邛歸途千里外秋月定相逢

正朝摘梅

蜀地寒猶暖正朝發早梅偏驚萬里客已復一年來

蜀道後期

客心爭日月來往預期程秋風不相待先至洛陽城

過蜀道山

我行春三月山中百花開披林入峭壁攀磴陟崔嵬白雲半峯起清江出峽來誰知高深意緬邈心悠哉

再使蜀道

眇眇葭萌道蒼蒼褒斜谷煙壑爭晦深雲山共重複古來風塵子同眩望鄉目芸閣有儒生軺車倦馳逐青春客岷嶺白露搖江服歲月鎮羈孤山川長返覆魚遊戀

深水鳥遷戀喬木如何別親愛坐去文章國蟋蟀鳴戶
庭蠨蛸網琴筑

深渡驛

旅宿青山夜荒庭白露秋洞房懸月影高枕聽江流猿
響寒巖樹螢飛古驛樓他鄉對搖落併覺起離憂

古泉驛

於陵仲子宅也

昔聞陳仲子守義辭三公身賃妻織屨樂亦在其中豈
無窮賤苦羞與傾巧同長白臨河上於陵入濟東我今
行至此感歎石泉空

下江南向夔州

天明江霧歇洲浦棹歌來綠水透迤去青山相向開城

臨蜀帝祀雲接楚王臺舊知巫山上遊子共徘徊

江路憶郡

霧斂江早明星翻漢將沒卧聞峽猿響起視榜人發倚
棹攀岸條憑船弄波月水宿馱洲渚晨光屢揮忽林澤
來不窮煙波去無歇結思笙竽里遙情遊俠窟年貌不
暫留歡愉及玄髮雲涓戀山海禽鳥懷燕越自非行役
人安知慕城闕

廣州江中作

去國歲方晏愁心轉不堪離人與江水終日向西南

江中誦經

實相歸懸解虛心暗在通澄江明月內應是色成空

江中遇黃領子劉隆

危石江中起孤雲嶺上還相逢皆得意何處是鄉關

卻歸在道中作

陳焦心息盡死意不期生何幸光華旦流人歸上京愁
將網共解眼與代俱明復是三階正還逢四海平誰能
定禮樂爲國著功成

還至端州驛前與高六別處

舊館分江口淒然望落暉相逢傳旅食臨別換征衣昔
記山川是今傷人代非往來皆此路生死不同歸

喜渡嶺

東漢興唐麻南河復禹謀甯知瘴癘地生入帝王州雷

雨蘇蟲蟄春陽放鸞鳩洄沿炎海畔登降閩山陬嶺路
分中夏川源得上流見花便獨笑看草卽忘憂自始居
重譯天星已再周鄉關絕歸望親戚不相求棄杖枯還
植窮鱗涸更浮道消黃鶴去運啟白駒留江妾晨炊黍
津童夜櫂舟盛明良可遇莫後洛陽遊

過漢南城歎古墳

舊國多陵墓荒涼無歲年洶湧蔽平岡汨若波濤連上
世千金子潛卧九重泉松柏翦無餘碑記滅罔傳葬於
不毛地咸謂楚先賢事盡情可識使人心悵然

至尉氏

夕次阮公臺嘯歌臨爽塏高名安足賴故物今皆改吾

兄昔茲邑遺愛稱賢宰桑中雉未飛屋上烏猶在途逢
舊毗吏城有同寮采遠見咸相迎拂館來欣待慈惠留
千室友子存四海始知魯衛間優劣相懸倍

襄州景空寺題融上人蘭若

高名出漢陰禪閣跨香岑眾山皆圍繞長川復迴臨雲
峯曉空變風木夜虛吟碧甃龍池滿蒼松虎徑深舊知
青巖憶偏入杳冥心何由侶飛錫從此脫朝簪

四月一日過江赴荊州

春色沅湘盡三年客始迴夏雲隨北帆同日過江來水
漫荆門出山平郢路開比肩羊叔子千載豈多才

襄陽路逢寒食

去年寒食洞庭波今年寒食襄陽路不辭著處尋山水
祇畏還家落春暮

巡邊在河北作二首

去年六月西河西今年六月北河北沙場磧路何爲爾
重氣輕生知許國人生在世能幾時壯年征戰髮如絲
會待安邊報明主作頌封山也未遲

撫劒空餘勇彎弧遂無力老去事如何據鞍長歎息故
交索將盡後進稀相識獨憐半死心尙有寒松直

入海二首

乘桴入南海海曠不可臨茫茫失方面混沌如凝陰雲
山相出沒天地互浮沈萬里無涯際云何測廣深潮波

自盈縮安得會虛心

海上三神山逍遙集眾仙靈心豈不同變化無常全龍
伯殊人類一釣兩鼇懸金臺此淪沒玉真時播遷問子
勞何事江上幾經年隰中生紅草所美非美然

清遠江峽山寺

流落經荒外逍遙此梵宮雲峯吐月白石壁淡煙紅寶
塔靈仙湧懸龕造化功天香涵竹氣虛唄引松風簷牖
飛花入房廊激水通猿鳴知山靜魚戲辨江空靜默將
何貴所貴心鏡同

相州冬日早衙

城外宵鐘斂閨中曙火殘朝光曜庭雪宿凍聚池寒正

色臨廳事疑詞定筆端除苛囹息伐枳吏人寬河內
功猶淺淮陽疾未安鏡中星髮變頓使世情闌

相州北亭

人務南亭少風煙北院多山花迷徑路池水拂藤蘿萍
散魚時舞林幽鳥乍歌悠然白雲意乘興抱琴過

相州山池作

嘗懷謝公詠山水陶嘉月及此年事衰徒看眾花發觀
魚樂何在聽鳥情都歇星漢流不停蓬萊去難越鄴中
秋麥秀淇上春雲沒日見塵物空如何靜心闕

岳州作二首

水國生秋草離居再及瓜山川臨洞穴風日望長沙物

土南州異關河北信賒日昏聞鵬鳥地熱見修虵遠人
夢歸路瘦馬嘶去家正有江潭月徘徊戀九華

夜夢雲闕閒從容簪屨列朝遊洞庭上緬望京華絕潦
收江未清火退山更熱重欲視欲醉惜滿氣如噎器留
魚鼈腥衣點蚊蚋血髮白思益壯心玄用彌拙冠劔日
苔蘚琴書坐廢撤唯有報恩字刻意長不滅

岳州行郡竹籬

山郡不溝郭荒居無翳壅愛人忠主利善守閉爲勇苟
非小勤率安得期逸寵板築恐土疏簑城嫌役重藩柵
聊可固筠篁近易奉差池截浦沙繚繞緣隈隴蠹似長
雲互森如高戟聳預絕豺狼憂知免牛羊恐閭里寬矯

步榛藪恣踏踵始果遊處心終日成閒拱

陪燕公行郡竹籬

趙冬曦

良臣乃國禎麾守去承明外戶人無閉浮江獸已行隨
來晉盜逸民化蜀風清郭郭從彝典州閭荷德聲小人
被天渥流宅巴邱城所賴中和正優游鑿與耕

荊州亭入朝

巫山雲雨峽湘水洞庭波九辯人猶擯三秋雁始過旃
裘吳地盡髻薦楚言多不果朝宗願其如江漢何

岳州西城

水國何遼曠風波遂極天西江三汜合南浦二湖連危
堞臨清境煩憂蹙豁然九圍觀掌內萬象閱眸前日去

長沙渚山橫雲夢田汀葭變秋色津樹入寒煙潛穴探
靈詭浮生揖聖仙至人今不見迹滅事空傳

岳州山城

山城豐日暇閉戶見天心東曠迎朝色西樓引夕陰書
觀千載近學靜二毛深忽有南風至吹君堂上琴

奉和山城

郡館臨清掌閒局坐白雲訟虛棠戶曙觀靜竹簷曛懸
榻迎賓下趨庭學禮聞風傳琴上意遙向日華紛

岳州晚景

晚景寒鴉集秋聲海雁歸水光流日去霞彩映江飛洲
白蘆花吐園红柿葉稀長沙卑暑地九月未成衣

遊洞庭湖二首

平湖曉望分仙嶠，氣氛氲鼓枻乘清渚。尋峯弄白雲，江
寒天一色。日靜水重文，樹坐參猿嘯。沙行入鷺羣，緣源
斑篠密。冒徑綠蘿紛，洞穴傳虛應。楓林覺自薰，雙童有
靈藥。願取獻明君。

緬邈洞庭岫，蔥蒙水霧色。宛在太湖中，可望不可卽。剖
竹守窮渚，開門對奇域。城池自縈籠，纓綬爲徽纆。靡日
不思往，經時始願克。飛棹越溟波，維舟恣攀陟。窳窳入
雲步，崎嶇倚松息。巖壇有鶴過，壁字無人識。滴石香乳
溜，垂崖靈草植。玩幽輕霧阻，討異忘曛逼。寒沙際水平，
霜樹籠煙直。空宮聞莫覩，地道窺難測。此處學金丹，何

人生羽翼誰傳九光要幾拜三仙職紫氣徒想像清潭
長眇默霓裳若有來覲我雲峯側

秋夜遊滄湖二首

并序

尹 忭

燕公以蓋司馬初到趙侍御客焉聿理方舟嬉遊滄壑
覽山川之異探泉石之奇騁望崇朝留尊待月一時之
樂豈不盛歟賦詩者列之如左河閒尹忭詞也

熊軾巴陵地鷁舟湘水潯江山與勢遠泉石自幽深杳
藹入萑壑冥茫見道心超然無俗事情宴有空林

江上饒奇山嶺羅雲水閒風秋樹色雜苔古色文斑巴
俗將干港滄湖凡幾灣嬉遊竟不盡乘月汎舟還

和尹從事二首

滄湖佳可遊，旣近復能幽。
林裏棲精舍，山間轉去舟。
雁飛江月冷，猿嘯野風秋。
不是迷鄉路，尋奇處處留。
坐嘯人事閒，佳遊野情發。
山門送落照，湖口望昇月。
林尋猿狖居，水戲黿鼉穴。
朔風吹飛雁，芳草亦云歇。

同前二首

趙冬曦

政理常多暇，方舟此泝洄。
吹笙虛洞答，舉楫便風催。
山暗雲尤辨，潭幽月稍來。
清溪無數曲，未盡莫先迴。
煙靄夕微蒙，幽灣賞未窮。
艤舟待初月，褰幌招遠風。
鶴聲聒幽浦，人火明暗叢。
東山雲壑意，不謂爾來同。

同前二首

張均

遠水沈西日，寒沙聚夜鷗。
平湖乘月滿，飛棹接星流。
黃

菜鳴淒吹蒼葭埽暗洲願移滄浦賞歸待潁川遊
灣潭幽意深杳靄湧泉岑石痕秋水落嵐聚夕陽沈澄
澈天爲底淵玄月作心青溪非大隱歸矣白雲溇

遊灩湖上寺

湖上奇峯積山中芳樹春何如絕世境來遇賞心人清
舊巖泉樂叻嚶鳥獸馴靜言觀聽裏萬法自成輪

同前

王 琚

春山臨遠壑水木自幽清夙志懷微上茲焉一放情雲
閒聽弄鳥煙上摘初英地側方無悶逾知道思精

同前

趙冬曦

江外多山水招要步馬來琴將天籟合酒共鳥歌催巖

坐攀紅藥溪行愛綠苔所懷非此地遊望亦徘徊

汎洞庭

尹 忭

風光浙瀝草中飄日采熒熒水上搖幸奉瀟湘雲壑意
山傍容與動仙橈

和尹從事

平湖一望上連天秋景千尋下洞泉忽驚水上光華滿
疑是乘舟到日邊

澗湖山寺二首

空山寂歷道心生虛谷迢遙野鳥聲禪室從來塵外賞
香臺豈是世中情雲閒東嶺千重出樹裏南湖一片明
若使巢由同此意不將蘿薜易簪纓

楚老遊山寺提攜觀畫壁揚袂指辟支睽眄相鬪鬪險
哉透撞兒百金賭一擲成敗身自受傍人那歎息

早霽南樓

山水佳新霽南樓玩初旭夜來枝半紅雨後洲全綠四
運相終始萬形紛代續適臨青草湖再變黃鸝曲地穴
穿東武江流下西蜀歌聞枉渚遭舞見長沙促心遠居
無陋神和生自足白髮悲上春知常謝先欲

奉和早霽南樓

趙冬曦

閒曙躋南樓憑軒四遐矚物華蕩暄氣春景媚時旭川
霽湘山孤林芳楚郊縟列巖重疊翠遠岸透池綠風帆
摩天垠艇人散灣曲鴻冥鶴舞迭猿叫鶯聲續羣動皆

熙熙噫余獨羈束常欽才子義聞鵬傷踈跼雅向騷人
文懷沙何迫促未知二賢意去矣從前欲

奉陪登南樓

尹 忭

君子每垂眷江山其流眄遠水林外明近巖霧中見終
日西北望何處是京縣屢登高春臺徒使淚如霰

同前

危樓寫洞湖積水照城隅命駕邀漁父通家引鳳雛山
晴紅藥市洲曉綠苗鋪舉目思鄉縣春光定不殊

同前

趙冬曦

寬慰何以歡陰氣亦登望孤島輕霧裏行舟白波上目
熒西北雲心醉東南陰疑昔日清溪子胡然無此狀

同前

客來已兩春更瞻韶光早花鳥玩環合江山復駢抱樓
形寫北潭堞勢凌青島白雲謝歸雁馳懷洛陽道

別澗湖

念別澗湖去浮舟更一臨千峯出浪險萬木抱煙深南
郡延恩渥東山戀宿心露花香欲醉時鳥轉餘音涉趣
皆留賞無奇不徧尋莫言山水間幽意在鳴琴

奉和別澗湖

趙冬曦

南湖美泉石君子玩幽奇灣澳陪臨泛巖岵共踐窺秋
風蘋桂竦暮景綠楊垂郢路委分竹湘濱擁去麾枉帆
懷勝賞留景惜差池水木且不棄情遊良可知

巴邱春作

日出洞庭水春山掛斷霞江涔相映發卉木共紛華湘
戍南浮闊荆關北望賒湖陰窺魍魎邱勢辨巴虵島戶
巢爲館漁人艇作家自憐心問景三歲客長沙

石門墨山二山相連有禪堂觀天下絕境

困輪江上山近在華容縣常陟巴邱首天晴遙可見佳
遊屢前諾芳月愆幽眷及此符守移歡言臨道便旣攜
賞心客復有送行掾竹徑入陰窅松崖上空藉草共林
一色雲與峯萬變探窺石門斷緣越沙澗轉兩山勢爭
雄峯巘相顧眇藥妙靈仙寶境華巖壑選清都西淵絕
金地東敞宴池果接園畦風煙邇臺殿高尋去石頂曠

覽天宇徧千山紛滿目百川豁對面騎來雲氣迎人去
鳥聲戀長揖桃源土舉世同企羨

遊龍山靜勝寺

每上襄陽樓遙望龍山樹鬱弗吐岡嶺微蒙在煙霧下
車歲已成飾馬問餘步苦霜衰野草愛日揚江煦雲對
石上塔風入松下路禪室宴三空仁祠同六趣兒童其
嬉謔猿鳥相驚顧南識桓公臺北亂先賢墓世上人何
在時聞心不住唯傳無盡燈可使有情悟

一柱觀

舊說江陵觀初疑神化來空中結雲閣綺靡隨風迴奈
何任一柱斯焉容眾材奇功非長世今餘草露臺

登九里臺 是楚樊姬墓

楚國所以霸樊姬有力焉不懷沈尹祿誰諳叔敖賢萬
化茫無在孤墳獨歸然北分陽臺陌南識郢城阡漠漠
渚宮樹蒼蒼雲夢田登高形勝出訪古令名傳自我來
符守因君樹蕙荃詩書將變俗絺纈忽彌天志闌三折
後愁植二毛前伫立帝京路遙心寄此篇

懷王墓

伊嘸不可信似此敗懷王客死曉關路返葬岐江陽啼
狄抱山月飢狐獵野霜一聞懷沙事千載盡悲涼

庾信宅

蘭成追宋玉舊宅偶詞人筆湧江山氣文驕雲雨神包

胥非救楚隨會返留秦獨有東陽守來嗟古樹春

張說之文集卷第八